

A Velenga Kamumu ne Isu Kristo i Herea e Markus

A Nita Vakalohoka

A viri i herea a Velenga Kamumu iea i uka ma i taki talea a rana. Pali si lohoka maea a viri i herea, a rana e Markus. A rana ni kilala balaka kupo na ngava dagi karaba. A rana tara e Ioanes Markus. Ne Apostolo 15:39, Kolosi 4:10, 2Tim 4:11, Pilemon 24, 1 Petrus 5:13, ni gale ia e Markus. Ne Apostolo 12:12, 12:25, 15:37 ni gale ia e Ioanes Markus. E huriki a matakari na tara na Vure hosi, ra ri bele muri ne Kristo, ri taki e Markus i herea a Velenga Kamumu iea.

A maka ngava ne Isu i here e Markus na Velenga Kamumu iea, i taki polo vona e Petrus. A vuhuna e Petrus ia a bakovi i laho tabukoi turane Isu, a matakari na tara na Vure. E Markus i turana e Petrus na pida i kupo tabukoi ne Petrus ge mate, pali e huriki a tara na Vure ri takia ge here puru ranga ngava i longo ne Petrus. Na tahuna e Markus i here a maka maki e Isu i taki, i rata, i muholi i kamumu, a vuhuna i taki polo vona a viri i laho tabukoi turana e Isu, re Petrus.

E Markus i made o Rom, i herea a Velenga Kamumu iea, na pida e 60 o 70 AD. E huriki a bakovi na lohokanga ala kupo ri luhoi tora maea, e Markus i here a maka nitovo ne Isu nga, ge habi ne huriki o Rom, ra ri ngaru ni ramai e Isu. E huriki a bakovi a ngatavine nga, a Iuda ranga, i uka ma ria a Iuda ranga.

A Velenga Kamumu ne Markus, ni here na nita Grik. E Isu i tovo e huriki na harikianga na Vure. I tovo ria ri gi ramaia, ge ia a hariki ne ria. E huriki a bakovi a ngatavine ri ngarua e Isu, a vuhuna i korimule e huriki ri giloa, i valili tala a hanitu vona ranga.

E Ioanes i Kado a Dala

(Mateo 3:1-11; Lukas 3:2-16; Ioanes 1:19-28)

1 ¹Iea a vuhuna a Velenga Kamumu ne Isu Kristo, a Tuna Vure.

² ^aE Isaia a propet i here puru hosi, i ta maea,
 “Mu longo! Iau ga rudua a vinuru nau ge muga vomu,
 ge pelekadoa a dalamu.

³ ^bA lohona viri i gale dagi na tabeke i ngeki i ta maea,
 ‘Mu pelekadoa a dala ne Bakovi Dagi.

‘Mu pelekadoa a dala ge laho vona ge kiripiripi.’”

⁴ ^cI mavonga, e Ioanes, a mari ni vahilolo, i luve na tabeke i ngeki. I vara e huriki ri gi pulo a vilone ria, muri ni gi vahilolo, lakea a Vure ge puga vuroki a vilo hale ne ria. ⁵ ^eE huriki lobo na tabeke ne Iudea, e huriki lobo o Ierusalem, ri lakea ne Ioanes, ri taki tala a vilo hale ne ria. Lakea e Ioanes i vahilolo ria na naru e Iordan. ⁶ ^dA padirodo ne Ioanes ni rata na vuna kamel. I rea na palabele ni rata na kulina me. I kani a koa, a ame na robo. ⁷ ^eE Ioanes i vara maea, “A bakovi tara ge muri valai nau, i tuhaka hateka nau. Iau i uka ma a bakovi kamumu, ga pasike puru, ga puga vuroki a mota na vahapolo vona.^f ⁸ ^gIau a vahilolo mua na naru. Pali ia bara i vahilolo mua na Hanu Kiripiripi.”

E Isu Ni Vahilolo

(Mateo 3:13; Lukas 3:21-22; Kolosi 2:12)

⁹ ^hNa parava tara, e Isu i malaga na tanga e Nasaret, na tabeke ne Galili, i lakea na naru e Iordan. Na tahuna i bele vonga, e Ioanes i vahiloloa. ¹⁰ ⁱNa tahuna e Isu i taratavaga rike na naru, i mata rike. Malaviriri kunana i masia a hunu i mata ka. A Hanuna Vure i puru valai vona, i manga balu. ¹¹ ^gA lohona viri i ta valai meli na hunu, i ta maea, “Ioe e Tugu a hategu. A vivi hateka vomu.”

E Isu Ni Toni

(Mateo 4:1-11; Lukas 4:1-13)

¹² ^jMalaviriri kunana a Hanuna Vure i rudua e Isu i lakea na tabeke i ngeki. ¹³ ^kI made vonga na parava i ravulu va, lakea e Satan i tonia. E Isu i made turana maka maki mahuri na robo, pali e huriki a agelo ri tuhoria.

E Isu i Tubu ni Leho

(Mateo 4:18-22; Lukas 5:2-11; Ioanes 1:35-42)

¹⁴ ^lMuri ne Ioanes ni ru dili na bavi, e Isu i hamule lakea na tabeke ne Galili, i vara vonga na Velenga Kamumu na Vure. ¹⁵ ^mI ta rike, i ta maea,

^a 1:2 Mal 3:1 ^b 1:3 Ais 40:3 ^c 1:4 Apo 13:24; 19:4 ^d 1:6 2Ki 1:8; Mat 11:8

^e 1:7 Apo 13:25 ^f 1:7 A leho na vorakato kunana ni puga vuroki a vahapolo na matakari vona. E Ioanes i ta maea, i vakasiri manga i lohoka vona e Isu i dagi hateka, pali ia e Ioanes i kiroko hateka. ^g 1:11 Sng 2:7; Ais 42:1; Mat 12:18; Mrk 9:7 ^h 1:13 Sng 91:11-13

ⁱ 1:14 Mrk 6:17 ^j 1:15 Mat 3:2

“Ra parava a Vure i takia hosi, i bele pali. A harikianga na Vure i popote ge bele. Mu pulo a vilone mua, mu luhoi tora a Velenga Kamumu!”

E Isu i Gale Muga a Murimuri Vona ala Va

¹⁶Na parava tara, e Isu i lalaho na gagana Darilomu e Galili, i matai e Simon rua e tarina e Andreas, ru ru a vuko, a vuhuna rua a tahodari.

¹⁷Lakea e Isu i taki rua, “Muru valai, muru muri nau. Ga tovo marua ni tuli valai nau e huriki a bakovi, i manga a hini ngane muru lakavu a manu.” ¹⁸Malaviriri kunana, ru pe purua a vuko ne rua, ru ramaia e Isu.

¹⁹I uka ma to laho basi hateka ma, lakea e Isu i matai e tune Sebedi ala rua, e Iakop e Ioanes. Ru made na aga, ru honoa a vuko ne rua i marape.

²⁰Malaviriri kunana i gale rua. Ru ha taroa e tamane rua, e Sebedi, i made na aga turana bolekoru ne tou, ru vano, ru ramaia e Isu.

E Isu i Lili Tala a Hanitu

(Lukas 4:31-37)

²¹Muri ri lakea na tanga e Kapernaum. A Parava Nimalo i bele ngane, lakea e Isu i dili malaviriri na roho na vaponga, i vakatubu ni vara. ²²^kE huriki ri turutu na vinara vona, a vuhuna i uka ma i vara manga e huriki a mari na vinara. I vara manga a bakovi i tahoka a nitora.

²³A bakovi tara pololilo na roho na vaponga i dili vona a hanitu. Lakea a bakovi iea i malaviriri kunana i gale maea, ²⁴^l“Isu, ioe a bakovi o Nasaret, o valai go rata navai mia? O valai ni ratapile mia? Iau a lohoka vomu. Ioe a Viri Malamala na Vure.”

²⁵Pali e Isu i tahatea a hanitu, i ta maea, “O vulai. O pagitala vona a bakovi iea!” ²⁶^mLakea a hanitu i pulua a bakovi iea, muri i haloho i ha tala vona.

²⁷E huriki lobo ri turutu hateka, ri vanana lae, “A ra maki iea i bele? A ngava karaba! Ra bakovi iea, i vara, i ta manga a bakovi i tahoka a nitora. Na tahuna i tono talea a hanitu, a hanitu i longototo kunanea!”

²⁸ⁿA nuverei na maki e Isu i rata i malaviriri kunana ni longo na tanga kiroko lobo na tabeke ne Galili.

E Isu i Vakamahuri e Huriki ala Kupo

(Mateo 8:14-17; Lukas 4:38-41)

²⁹Malaviriri kunana, e Isu i pagitala na roho na vaponga, i laho turane Iakop e Ioanes, to lakea na ruma ne Simon rua e Andreas. ³⁰E lahuane Simon i giloa, i rongo a kulina, i mahita na kiri. Lakea ni vakalongo e Isu vona. ³¹I mavonga e Isu i lokovonga maia, i nugua a limana, i tulipesia. Lakea i lobo a gilanga vona, i vakatubu ni gutu a maki ni kani ne ria.

^k 1:22 Mat 7:28-29 ^l 1:24 Mrk 5:7 ^m 1:26 Mrk 9:26 ⁿ 1:28 Mat 4:24

³²Na tahuna a haro i rolo pali, ni tuli valai vona e huriki ri giloo turana e huriki i dili ne ria a hanitu. ³³E huriki lobo na tanga ri vapopo na mataruma, ³⁴^olakea e Isu i vakamahuri e huriki ri tahoka a maka gilanga legelege. I lili tala e huriki a hanitu i kupo, i ta tora ne ria nahea ri gi ta, a vuhuna ri lohoka vona.

E Isu i Vara o Galili

(Lukas 4:42-44)

³⁵^pNa hatelanga pokopoko, e Isu i vuho lakea na tabeke i ngeki, i vasileki vonga. ³⁶Muri e Simon, e huriki a turana ri matakanea. ³⁷Ri matavisia ngane, ri takia, ri ta maea, “E huriki lobo ri matakana ioe.” ³⁸Pali e Isu i koli, i ta maea, “Si gi lakea na maka tanga tabukoi nga, ga vara taro vonga. Ra leho iea kunana a valai vona.” ³⁹^qLakea i laho lobo vona a tabeke ne Galili, i vara na maka roho na vaponga, i lili tala e huriki a hanitu.

A Bakovi i Vona a Patala

(Mateo 8:1-4; Lukas 5:12-16)

⁴⁰A bakovi i vona a patala i lakea ne Isu, i nana tora ia, i turume puru, i ta maea, “Toe bara o ngaru, o vakamatapado iau.”

⁴¹Lakea e Isu i dodo hatekea, i toto talea a limana, i padoia, i ta maea, “Iau a ngaru go matapado. O matapado!” ⁴²I malaviriri kunana i malaharuri vona a patala, i matapado.

⁴³E Isu i rudua ge vano malaviriri, lakea i taki tora ia i ta maea, ⁴⁴^r“Naha ni vakalongoa tara viri. Pali o vano, o vakasiri ioe na prister. Muri o habi a nihabi e Moses i taki hosi, ge ne vona a nivakamatapado, ri gi matakilaka vona ioe ni vakamatapado pali.” ⁴⁵Pali a bakovi iea i vano ngane, i vakalongo lae e huriki, i nunu viliha lae a velengana. Ngane e Isu i keri ni laho kavakava ge dili na tanga dagi. I made polovavo kunana na tabeke i ngeki. Pali e huriki na tanga lobo ri lakea maia, ri masia vonga.

A Beu

(Mateo 9:1-8; Lukas 5:17-26)

2 ¹Muri na parava ranga, e Isu i lakea tabu o Kapernaum. E huriki a bakovi a ngatavine ri longoa e Isu i dili pali na ruma, lakea ri dili maia. ²A ruma i vonu liu. A hini polovavo ranga, ri vapesihi vona e huriki. Lakea e Isu i vara ria na nitana Vure. ³Na tahuna e Isu i vavara, a bakovi ala va ri kaloho vilia vona a bakovi i beu. ⁴Pali ri keri ni kalohoa

^o 1:34 Mrk 3:10-12 ^p 1:35 Mat 14:23; Mrk 6:46 ^q 1:39 Mat 4:23; 9:35

^r 1:44 Levi 14:1-32

lakea ne Isu, a vuhuna i kupo hateka e huriki ri vapesihi. Lakea ri pukea a mapana ruma polomeli. Ri puka lobo, muri ri vakatavore purua a bakovi i mahita na kiri. ⁵Na tahuna e Isu i matai ria ri luhoi tora hateka ia, i takia a beu, “O tugu, a puga vuroki a naro hale vomu.”

⁶Pali e huriki a mari na vinara ri made vonga, ri luhoi maea, ⁷“I navai a bakovi iea i ta maea? I ngaru ni bole a murina Vure! I uka tara viri ge puga a naro hale, a Vure kikeri kunana.”

⁸E Isu, i malaviriri kunana i lohoka vona a ngava ri luhoi hateka na hatene ria, lakea i taki ria, “I navai mu luhoi mavonga? ⁹I vai a ngava kavakava ga taki a beu vona, ‘Iau a puga a naro hale vomu.’ O ga ta maea, ‘O pesi rike, o kaloho a kiri vomu, o laho.’ ¹⁰Pali ngane ga vakasiri mua vona a Tuna Bakovi i tahoka a nitora koea na malala ni puga a naro hale.” Ngane i mata lakea na beu, i takia, ¹¹“A taki ioe, o pesi rike, o kalohoa a kiri vomu, o lakea na ruma vomu.” ¹²Lakea i pesi rike, i malaviriri kunana i kaloho a kiri vona, i laho tala. E huriki lobo ri masia, ri turutu, ri kavurikea a Vure, ri ta maea, “I uka ma mi masia hosi tara maki ge maea!”

E Levi

(Mateo 9:9-13; Lukas 5:27-32)

¹³Muri e Isu i pagitala, i hamule lakea na Darilomu e Galili. E huriki ala kupo ri lakea vona, lakea i vara ria. ¹⁴Na tahuna i laho lokovonga i masia e Levi, e tune Alpius, i mamade na roho ni bole a takis. Lakea e Isu i takia, “O muri nau.” Lakea e Levi i pesi rike, i muri maia. ¹⁵Muri e Isu i vano, i kani na ruma ne Levi. E huriki a bakovi ni bole a takis, e huriki a bakovi hale, ri kani turane Isu, e huriki a murimuri vona, a vuhuna e huriki ri muri vona ri ala kupo. ¹⁶Na tahuna e huriki a mari na vinara ne huriki a Pariseo ri masia e Isu i kani turana e huriki a bakovi hale, e huriki a bakovi ni bole a takis, ri nana e huriki a murimuri vona, “I navai i kani turana e huriki a bakovi ni bole a takis, e huriki a bakovi hale?”

¹⁷Na tahuna e Isu i longoa a ninana iea, i taki ria, “E huriki i uka ma ri giloa, i uka ma ri gi lakea na dokta. E huriki ri giloa kunana bara ri masia. A valai i uka ma ga gale mua e huriki mu luhoi ta mu naro kamumu mu gu pulo a vilone mua. A valai ga gale e huriki ri naro hale ri gi pulo a vilone ria.”

A Niperemu

(Mateo 9:14-17; Lukas 5:33-39)

¹⁸E huriki a murimuri ne Ioanes, e huriki a Pariseo na parava ranga ri peremu ni kani. Lakea e huriki ranga ri valai, ri nanea e Isu, “I navai e

* 2:16 Mat 11:19

huriki a murimuri ne Ioanes, a murimuri ne huriki a Pariseo ri peremu, pali e huriki a murimuri vomu i uka ma ri peremu?”

¹⁹E Isu i koli i ta maea, “E huriki ri lakea na habu na bakovi i parangi karaba i uka ma ri gi peremu, a vuhuna a bakovi i parangi karaba i tabana turane ria. ²⁰Muri ma a bakovi i parangi karaba bara ni tuli tala ne ria, bara ri peremu.

²¹“I uka tara viri ge bolea a mavidana lavalava karaba ge rahi karia turana hini marape na matutu na varakia. Bara i rata mavonga, na tahuna i loi a varakia vona, a mavidana lavalava karaba bara i hoho, i turapea a matutuna varakia, muri bara i ratea a hini mavida i ngavaka. ²²Pali i uka tara viri ge guru dili a vain karaba na matutuna buroi ni rata na kulina me. Bara i rata mavonga, bara i mapoda a matutuna buroi. Pali a vain a buroi bara ru lobo tavula varago. A viri i lohoka bara i guru dili a vain karaba na buroi karaba.”

A Bakovi Dagi na Parava Nimalo

(Mateo 12:1-8; Lukas 6:1-5)

²³Na Parava Nimalo tara, e Isu i laho padikudu na hania na vit. E huriki a murimuri vona ri laho turana, ri vakatubu ni pasi a vutuna vit, a vuhuna ri vitolo. ²⁴“Lakea e huriki a Pariseo ri nanea, “Mata lakea! I navai e huriki a murimuri vomu ri ratea a maki ni hatekakari na Parava Nimalo?”

²⁵“E Isu i koli, i ta maea, “Ra mua, i uka ma mu gia na hinere a naro e Davit i ratea hosi, na tahuna i turana e huriki a tara vona ri vitolo? ²⁶“Na tahuna iea, e Abiatar ia a prister dagi. Lakea e Davit i dili na roho na Vure, i kani a bret. A bret iea, a nihabi na Vure. A vinara i taki e huriki a prister kunana ri gi kani. Pali e Davit i bole ranga, i habi ne huriki a tara vona, ri kani.”

²⁷“Lakea e Isu i taki ria, “I uka ma ni rata a bakovi ne vona a Parava Nimalo. A Parava Nimalo ni rata ne vona a bakovi. ²⁸I mavonga kunana, a Tuna Bakovi ia a Bakovi Dagi na maki lobo. A Parava Nimalo tara, ia a Bakovi Dagi vona.”

A Bakovi i Mate a Limana

(Mateo 12:9-14; Lukas 6:6-11)

3 ¹Na parava tara, e Isu i dili na roho na vaponga. I masia vonga a bakovi i mate a limana. ²E huriki ranga ri ngaru ni matakana a ngava ri gi padi virihi e Isu vona, lakea ri matanonoa, a ra ge ratea? Ge vakamahuri a bakovi iea na Parava Nimalo, o ge uka? ³Ngane e Isu i takia a bakovi i mate a limana, “O pesi rike na matane huriki lobo.”

‘ 2:24 Vin 23:25 ¨ 2:25 1Sam 21:1-6 ˇ 2:26 Levi 24:5-9 ¨ 2:27 Vin 5:14

⁴*Muri i nana ria, “A vinara i ta navai vona a naro si gi ratea na Parava Nimalo? Ni gi rata a naro kamumu, o ni gi rata a naro hale? Ni gi kori a viri, o ni gi rabalaki a viri?” Pali ri mangulu tete ria.

⁵Lakea e Isu i madihi a hatena, i mata lae ne ria. I dodo, a vuhuna ri gigi tora hateka. I takia a bakovi, i ta maea, “O toto talea a limamu.” A bakovi i toto talea a limana, lakea a limana i tavaga mule. ⁶Malaviriri kunana e huriki a Pariseo ri pagitala, ri vakatubu ni vata turana e huriki a tara ne Herod na dala ri gi rabalaki e Isu vona.

E Huriki ala Kupo Ri Ramai e Isu (*Mateo 12:15-16; Lukas 6:17-19*)

⁷E Isu i pe a tabeke iea turana e huriki a murimuri vona, ri lakea na darilomu. E huriki ala kupo hateka ri muri vona. E huriki na tabeke ne Galili, e huriki na tabeke ne Iudea, ⁸e huriki o Ierusalem, e huriki na tabeke ne Idumea, e huriki na tabeke tara na naru e Iordan, e huriki na maka tanga ri pesi halui e Tair, e Sidon. Ria lobo ri longo a maka maki i rata e Isu, ri valai maia. ⁹E huriki ri ala kupo hateka, lakea e Isu i taki e huriki a murimuri vona ri gi kanu vilia vona a aga, ge pesi langa vona, ma ge bole tugua e huriki. ¹⁰^zE huriki ri tahoka a gilanga ri boletugu, ri gi padoia e Isu, a vuhuna e Isu i vakamahuri muga pali e huriki ala kupo. ¹¹“Na tahuna e huriki i dili ne ria a hanitu ri masia, ri tabuli puru na ngalana, lakea e huriki a hanitu ri gale tala, ri ta maea, “Ioe a Tuna Vure.” ¹²^bPali e Isu i taki e huriki a hanitu nahea ri gi taki tala ne huriki, ia e rei muholi.

E Huriki a Apostolo ne Isu (*Mateo 10:1-4; Lukas 6:12-16; Apostolo 1:13*)

¹³E Isu i sike na gagana lolo, i gale valai vona e huriki i ngaru, lakea ri valai vona. ¹⁴I vulaki a viri ala ravulu a polona i rua ri gi turana, i gale ria a apostolo. Muri ge rudu tala ria, ri gi vara, ¹⁵ri gi tahoka a nitora ni lili tala a hanitu. ¹⁶“A viri ala ravulu a polona i rua, i vulaki, a rane ria ra nga: e Simon (e Isu i vunua e Petrus), ¹⁷^de Iakop e Ioanes rua e tune Sebedi (e Isu i vunua kalale rua e Boanerges, ra i maia: e maki tarina rua a vilone rua i manga a hini maravila, a hini i kururu), ¹⁸e Andreas, e Pilip, e Bartolemeus, e Mateo, e Tomas, e Iakop tune Alpius, e Tadeus, e Simon a tara ne huriki a Silot,^e ¹⁹e Iudas Iskariot, ra viri i habi na limana pile e Isu.

^x **3:4** Luk 14:3 ^y **3:6** Mat 22:15-16 ^z **3:10** Mat 14:36 ^a **3:11** Luk 4:41 ^b **3:12** Mrk 1:34
^c **3:16** Ion 1:42 ^d **3:17** Luk 9:54 ^e **3:18** A tara ne huriki a Silot ri marikoi e huriki a Rom ri gi matakari Israel.

A Naro Hale Tara i Uka Ma Ni Gi Puga
(*Mateo 12:24-32; Lukas 11:14-23; 12:10*)

²⁰Muri e Isu i dili na ruma, pali e huriki ri vapopo tabu mai ia, lakea e Isu turana e huriki a murimuri vona ri keri ni kani. ²¹E huriki a kabu ne Isu ri longo, lakea ri vano ri gi tuli mulea, a vuhuna ri takia ta i manga.

²²^fE huriki a mari na vinara ri valai o Ierusalem, ri ta maea, “I dili vona e Belsabub.^g I lili tala e huriki a hanitu na nitora na hariki ne huriki a hanitu.”

²³Lakea e Isu i gale ria, i taki ria vona a nita vakakika, “E Satan ge lili tala mule navai ia? ²⁴Bara a tanga tara i vapida ni pesi palupu, a tanga iea i uka ma ge pesi tora. ²⁵A kabu tara bara i vapida ni pesi palupu, a kabu iea i uka ma ge pesi tora. ²⁶Pali e Satan i uka ma ge ngaru mulea, ge vakalipida, i uka ma ge pesi tora. A nilobona i valai pali. ²⁷I muholi hateka, i uka tara viri ge dili tavula na ruma na bakovi hateka tara, ge bole tavula a maka mahala vona. A naro bara i rata mugea, bara i kolotata taroa a bakovi hateka, muri bara i panaho na ruma vona. ²⁸A taki muholi mua, a maka naro hale, a maka harogianga dagi i rata e huriki a bakovi bara ni puga. ²⁹Pali e rei i harogia a Hanu Kiripiripi, i uka ma ni gi puga a naro hale vona. A naro hale vona bara i tabuli vakaroro.”

³⁰E Isu i takia a nita iea, a vuhuna ri taki ia ta i dili vona a hanitu.

E Kinane Isu, e Tarina Mai
(*Mateo 12:46-50; Lukas 8:19-21*)

³¹^hMuri e kinana, e huriki e tarina ri bele, ri pesi polovavo na ruma, ri rudua tara viri ge dili, ge galea. ³²Lakea e huriki ri made halui e Isu ri takia, “Oe! E kinamu, e tarimu mai, ri pesi polovavo, ri ngaru ni matai ioe.”

³³Lakea e Isu i nana mule ria, “E rei e nana? E rei e huriki e tarigu?” ³⁴I mata lakea ne huriki ri made halui ia, i taki ria, “E huriki ri made koea, ri manga e nana e turagu. ³⁵E rei a viri i muri mai a ningaru na Vure i manga e turagu, e kurabagu, e nana.”

A Nivakakika na Viri i Varo a Vit
(*Mateo 13:1-9; Lukas 8:4-8*)

4 ¹E Isu i vara tabu na dahana darilomu, i manga a hini muga. E huriki ri made halui ia ri ala kupo hateka, lakea e Isu i rike na aga, i pasi polovavo popote. Pali e huriki ri made pololilo na lavu. ²ⁱI vara ria

^f 3:22 Mat 9:34; 10:25 ^g 3:22 E Belsabub a rana tara e Satan. ^h 3:31 Mrk 6:3; Ion 2:12; Apo 1:14 ⁱ 4:1 Mrk 3:7-9; Luk 5:1-3 ^j 4:2 Mat 13:34; Mrk 4:33-34

na maka ngava i kupo, na nita vakakika, i ta maea, ³“Mu longo valai! A bakovi ni leho na hania i varo a vutuna vit. ⁴Na tahuna i voro lae a vutuna vit, ranga ri boru puru ramai a dala, lakea a maka kadirovo ri valai, ri kani lobo.

⁵“A maka vutuna vit ranga ri boru langa na hini kedokedo, na hini i uka ma i tahoka hateka a malala. Lakea ri koru rike malaviriri, a vuhuna a malala i tabuli polomeli kunana. ⁶Pali na tahuna a haro i rike, i kani ria, ri malai, a vuhuna a kane ria i uka ma ri puru hateka.

⁷“A vutuna vit ranga ri boru puru na hini i vona a barakau. Muri a barakau i koru rike, i kae ria, ri keru ni vua.

⁸“Pali a vutuna ranga ri boru langa na malala kamumu. Ri gaga, ri koru rike, ri vakabele a kanena i kupo. Ri vakabele i ravulu tolu ranga, i ravulu polotara ranga, pali ranga ri vakabele i ravulu mule ma a murina balaka taku (100).”

⁹Muri e Isu i ta maea, “E rei a viri i ngaru ni longokilalea a ngavagu, ge longo kamumu, ge luhoi kado.”

¹⁰E huriki lobo ri vano pali, lakea a murimuri vona ala ravulu a polona i rua, turana e huriki ranga, ri nanea ge tuveve poloa ne ria a nita vakakika.

¹¹Lakea i ta maea, “A nita kapiloho na harikianga na Vure ni vakasiri pali ne mua. Pali e huriki ri made polovavo, a ngava lobo ni ta vakakika ne ria. ¹²^kNi ta vakakika ne ria,

‘ri gi matai, pali i uka ma ri gi matakilala.

Ri gi longo, pali i uka ma ri gi longokilala.

Ma ri gi pulo a vilone ria, ga puga vuroki a naro hale ne ria.’ ”

A Pelegona Nivakakika na Vutuna Vit

(Mateo 13:18-23; Lukas 8:11-15)

¹³Muri e Isu i nana ria, “Mua i uka ma mu longokilalea a nita vakakika iea? Pali mu gu longokilala navai a maka nita vakakika ranga?

¹⁴“A bakovi i varo a vutuna vit i manga a viri i habi a ngava. ¹⁵E huriki a bakovi ranga, ri manga a dala, a vutuna vit ni voro langa vona. Na tahuna ri longo a nita, e Satan i valai malaviriri, i bole tala ra ngava ni varo.

¹⁶“E huriki ranga ri manga a hini kedokedo, a vutuna vit ni voro langa vona. Ri longo a nita, ri malaviriri kunana ri bolea, ri vivi vona. Pali i uka ma ri pesi tora, ¹⁷a vuhuna a kane ria i uka ma i puru hateka. Na tahuna a maregoa i bele, o e huriki ri vakamadihi ria a vuhuna ri ramaia a nita iea, ri ha malaviriri kunana.

^k 4:12 Ais 6:9-10; Apo 28:26-27

18 “Pali e huriki ranga ri manga a hini i vona a barakau, a vutuna vit ni voro langa vona. Ri longoa a ngava, 19^lpali a niluhoi legelege na nimade na malala, a nimasigoro na mahala, a ningaru na maki ranga ri valai ri kavitagau a ngava ni varo, lakea i uka ma ri vua.

20 “E huriki ranga ri manga a malala kamumu, a vutuna vit ni voro langa vona. Ri longoa a ngava, ri bolea, ri vakabele a vutuna i ravulu tolu ranga, i ravulu polotara ranga, pali ranga i ravulu mule ma a murina balaka taku (100). Ri bele kupo hateka na vutuna ni varo muga.”

A Lam

(Lukas 8:16-18)

21^mE Isu i taki ria, “A lam i uka ma si namia, muri si gi ru kapilohoa. Bara si ru langea na dede. 22ⁿA maki ni ruhulolo bara i bele kavakava. A maki ni ta ruhulolo vona, bara ni ta pukatala vona. 23^E rei a viri i ngaru ni longokilalea a ngavagu, ge longo kamumu, ge luhoi kado.”

24^oI taki tabu ria, i ta maea, “Mu luhoi kado kamumu a ngava mu longo. A naro mu rata virihi e huriki ranga, a Vure tara bara i rata virihi mua vona, lakea bara ni habi tabu ranga. 25^pE rei a viri i tahoka a maki pali, bara ni habi tabu vona ranga. Pali e rei a viri i uka ma i tahoka a maki, bara ni bole mule vona a maki popote i tahoka pali.”

A Nivakakika na Vutuna Vit Ni Varo

26 E Isu i ta maea tabu, “A harikianga na Vure i manga a bakovi i voro lae a vutuna vit na malala. 27^I voro lobo a vutuna vit, i vano i made kunana. A maka vutuna vit ri gaga, ri koru rike, pali a bakovi i uka ma i lohoka vona ri koru rike navai. 28^A malala kunana i ratea a vutuna i gaga. Muri a pagana i lubu, i koru rike, lakea a vuana i lua tala na mapana vit. 29^q Pali na tahuna a kanena i moro ngane, a bakovi iea i valai malaviriri, i vali a vit, i ru kadolu, a vuhuna a parava ni mirio i valai pali.”

A Nivakakika na Vutuna Mastad

(Mateo 13:31-35; Lukas 13:18-19)

30 E Isu i ta maea tabu, “Ga ta navai tabu vona a harikianga na Vure? E rei a nivakakika ga tonia vona? 31^I manga a vutuna mastad, ra i vutu kiroko liu ni varo na malala. 32^P Pali na tahuna ni varo, i koru rike, i langui lobo a maki ni varo na hania. A rahana i buroro, lakea a maka kadirovo bara ri hae a nune ria vona.”

33^{Na} tahuna e Isu i vara e huriki, bara i rata bala a nita vakakika, i muri mai a lohokanga ne ria. 34^I uka ma i ta kavakava,

^l 4:19 Mat 19:23-24 ^m 4:21 Mat 5:15; Luk 11:33 ⁿ 4:22 Mat 10:26; Luk 12:2
^o 4:24 Mat 7:2 ^p 4:25 Mat 13:12; 25:29; Luk 19:26 ^q 4:29 Jol 3:13; Kap 14:15

i ta vakakika kunana. Pali na tahuna i made turana e huriki a murimuri vona kunana, bara i tuveve polo ne ria a ngava lobo.

E Isu i Vakamalilo a Dari

(Mateo 8:18,23-27; Lukas 8:22-25)

³⁵Na parava iea, i malunga pali a hini, lakea e Isu i taki e huriki a murimuri vona, “Si gi vore lakea na tabeke tara na darilomu.”

³⁶Lakea ri rike turana e Isu na aga i made muga vona, ri vano. I ranga e huriki ri rike na aga ne ria, ri vano turane ria. ³⁷Muri a vilu dagi i bele, i rere tagua a aga, i ratea i popote ge mabubu. ³⁸E Isu i mahita langa na moke na kuli na aga, lakea e huriki a murimuri ri vangoa, ri takia, “Mari ni tovo, i uka ma o luhoi lege? Bara si pasiri!”

³⁹Lakea i pesi rike, i tahatea a vilu, i takia a bokona dari, “O pasi puru! Naha ni kuluko!”

Muri i pasi puru a vilu, i puru a malilo i ngapa.

⁴⁰Muri i nana e huriki a murimuri vona, “I navai mu mangenge? Ra mua, i uka ma mu luhoi tora ma?”

⁴¹Ri mangenge hateka, lakea ri vanana lae, “E rei a viri iea? A vilu, a dari ru longototoa!”

E Isu i Kori a Viri i Dili Vona a Hanitu

(Mateo 8:28-34; Lukas 8:26-39)

5 ¹Muri, ri vore kudua a darilomu, ri bele na tabeke ne huriki a Gerasa. ²E Isu i raga na aga, malaviriri kunana a bakovi tara i dili vona a hanitu i pagitala na murine huriki ri mate, i valai ge tagui e Isu. ³Ra bakovi iea i mahita na murine huriki ri mate. I uka tara viri ge tuhaka ge kolotata tabu ia. A sen tara, i uka ma i karea. ⁴Balaka kupo ni kolotata a limana a vahana, pali i rakudu a sen na limana, i rakudu a aen na vahana. I uka tara viri ge kinigao ge lakavua. ⁵Na rodo a haro vakaroro, i laho lae na murine huriki ri mate, na maka lolo, i haloho lae, i pala mule a kulina na kedo.

⁶Ra bakovi iea, na tahuna i mata basi, i masia e Isu, i nunu maia, i turume puru na ngalana, i kavurikea. ⁷A hanitu pololilo vona i gale dagi, i ta maea, “Isu, Tuna Vure Meli Liu. Go rata navai iau? Iau a nana ioe na matana Vure, naha ni ratapile iau.” ⁸I gale dagi mavonga, a vuhuna e Isu i taki mugea i ta maea, “O pagitala vona a bakovi iea, ioe a hanitu kato.”

⁹Lakea e Isu i nanea, “E rei a ramu?”

^r 5:7 Mrk 1:24

A bakovi i koli i ta maea, “A ragu e Tara, a vuhuna mi ala kupo.”^s
¹⁰Lakea e huriki a hanitu ri taki torea e Isu, nahea ge lili tala ria na tabeke iea.

¹¹A kabuna boro ri kakani tabukoi na dahana lolo. ¹²Lakea e huriki a hanitu ri taki torea e Isu, ri ta maea, “O rudu mia lakea na kabuna boro, mi gi dili ne ria.”

¹³E Isu i longo a ninana ne ria, lakea e huriki a hanitu ri pagitala vona a bakovi iea, ri dili na maka boro. Lakea a kabuna boro ri nunu puru na gali, ri page puru na darilomu, ri pasiri. A maka boro ri 2,000.

¹⁴E huriki a matakari na boro ri ha, ri vakalongo lae e huriki na tanga, e huriki na robo viliha vonga. Lakea e huriki ri lokovonga ri gi matai a maki i bele. ¹⁵Na tahuna ri bele ne Isu, ri masia ra bakovi i dili muga vona a tara na hanitu. Ri masia i made, i rodo a varakia, i kamumu a niluhoi vona, lakea ri mangenge. ¹⁶E huriki ri matai, ri vakalongo e huriki ranga na maki i bele na bakovi ra i dili muga vona a hanitu, a maki i bele na kabuna boro. ¹⁷Muri ri taki torea e Isu ge pe a tabeke ne ria, ge lakea na tanga tara.

¹⁸Na tahuna e Isu i pesi, ta ge rike na aga, lakea ra bakovi i dili muga vona a hanitu, i takia e Isu i ngaru ni laho turana. ¹⁹Pali e Isu i takia i ta maea, “I uka. O lakea na tanga vomu, o vakalongo a kabu vomu vona a maki dagi e Bakovi Dagi i rata virihi ioe vona. O vakalongo ria na hini i dodo ioe.” ²⁰Lakea a bakovi iea i vano, i vakatubu ni vakalongo o Dekapolis^t a maka maki i rata vona e Isu. Lakea e huriki lobo ri longoa a nuverei vona ri turutu.

A Sirula i Mate

(Mateo 9:18-26; Lukas 8:40-56)

²¹E Isu i vorekudu tabua a darilomu, i lakea na tabekena tara. Lakea e huriki ala kupo ri valai, ri pesi halui ia na dahana darilomu. ²²I bele vona tara matakari na roho na vaponga, a rana e Ierus. Na tahuna i masia e Isu, i lokovonga maia, i turume puru tabukoi na vahana. ²³Lakea i taki tora ia, i ta maea, “E tugu ngatavine i popote ge mate. A ngaru muholi ioe go valai, go ru langa a limamu vona, ge tavaga.”

²⁴Lakea e Isu i lokovonga turana. E huriki ala kupo ri muri vona, ri vakopekope halui ia. ²⁵A ngatavine tara, i pori vona a dara na pida i ravulu a polona i rua, i turane ria. ²⁶Ra ngatavine iea i matai pali e huriki a dokta, pali i bole a nimadihi dagi ne ria, i vakalobo liu pali a moni vona. Pali i uka ma i tavaga. I bele dagi vona a gilanga. ²⁷Na tahuna a ngatavine i longoa e Isu i bele vonga, i vano, i pesi turana e

^s 5:9 Na nita Grik a tara i manga ‘Legio.’ ‘Legio’ i manga a tara na nugumaheto ala 6,000.

^t 5:20 A ngava e ‘Dekapolis’ na nita Grik i manga ‘a Tanga i Ravulu.’

huriki, i laho valai muri, i padoi a varakia ne Isu, ²⁸a vuhuna i luhoi maea, “Iau ga padoi kunanea a varakia vona, bara tavaga.”

²⁹Na tahuna i padoi a varakia ne Isu, i malaviriri kunana i lobo ni tua a darana, i hataki a kakaina i lobo vona a gilanga. ³⁰“E Isu i malaviriri kunana i hataki kilalea a nitora i pagitala vona. I ngalakapulo lakea ne huriki, i nana, “E rei i padoi a varakia nau?”

³¹E huriki a murimuri vona ri ta maea, “O matai e huriki ala kupo ri vapopo halui ioe. Pali i navai o nana, ‘E rei i padoi a varakia nau?’ ”

³²Pali e Isu i tabana ni matakanea a viri i padoi a varakia vona.

³³Lakea a ngatavine i lakea ne Isu, i turume puru na ngalana, a vuhuna i lohoka vona i mahuri pali. I mangenge hateka, lakea i ta muholi, i vakalongoa vona a maki i ratea. ³⁴“Lakea e Isu i takia a ngatavine, “O tugu, ioe o mahuri a vuhuna o luhoi tora iau. O vano na nivalemu, a gilanga vomu i lobo.”

³⁵E Isu i tabana ni ta, ri bele ranga bakovi. Ri valai na ruma ne Ierus, ra matakari na roho na vaponga, lakea ri ta maea, “Naha ni vakapae tabua a mari ni tovo. E tumu i mate pali.”

³⁶Pali e Isu i uka ma i longo mai a hini ri taki, lakea i takia e Ierus, i ta maea, “Naha ni mangenge. O luhoi tora iau.”

³⁷I taki e huriki lobo ri gi made vonga. E huriki ri muri vona kunana e Petrus, e Iakop, e Ioanes e turane Iakop. ³⁸Na tahuna ri bele na ruma na matakari na roho na vaponga, i matai e huriki ri tangi, ri haloho dagi. ³⁹I dili na ruma, i taki ria, “I navai mu tangi, mu haloho dagi? A sirula i uka ma i mate. I mahita kunana.”

⁴⁰Lakea ri nongo vakia. Pali i tono tala ria. I dili turana e tamana koma, e kinana koma, a murimuri vona ala tolu, ri lakea na hini i tabuli vona a podana sirula. ⁴¹“Lakea e Isu i nugua a limana, i ta maea, “*Talita kouw*.”^x I maea, “Sirula, a taki ioe o pesi rike.”

⁴²I malaviriri kunana, a sirula i pesi rike, i laho. A pida vona i ravulu a polona i rua. Na tahuna ri masia, ri turutu hateka. ⁴³I taki tora ria, nahea ri gi vakalongoa tara viri. Lakea i taki ria ri gi habi vona ranga maki ge kani.

A Propet i Uka Ma Ni Togo (Mateo 13:53-58; Lukas 4:16-30)

6 ¹E Isu i pea a tanga iea, i vano turana e huriki a murimuri vona, ri lakea na tanga vona. ²Na Parava Nimalo e Isu i vakatubu ni vara pololilo na roho na vaponga. Na tahuna e huriki ri longoa ri turutu vona, ri nana, “Ra bakovi iea, i bole vai a naro nga? E rei i habia vona a

^u 5:30 Luk 6:19 ^v 5:34 Mrk 10:52; Luk 7:50; 17:19 ^w 5:41 Luk 7:14 ^x 5:41 A ngava e ‘Talita Koum’ a nita Aram. ^y 6:2 Ion 7:15

lohokanga, a nitora ni rata a nivakasiri? ³Ia a mari ni hae a roho kunana. Pali e kinana, e Maria, e tarina e Iakop, e Ioses, e Iuda, e Simon. Pali e huriki e kurabana ri made turane hita.” Lakea i madihi a hatene ria vona.

⁴Pali e Isu i taki ria, i ta maea, “A propet ni togo na tanga lobo. Pali e huriki a bakovi a ngatavine na tanga vona i uka ma ri togoa.”

⁵E Isu i keru ni rata vonga ranga nivakasiri. I ru langa kunana a limana ne huriki ranga ri giloa, i vakatavaga ria. ⁶I turutu vona a hini i uka ma ri luhoi tora ia. Muri i vano, i laho lae, i vara na maka tanga takutaku.

E Isu i Rudu Tala e Huriki a Vinuru Vona

(Mateo 10:5-15; Lukas 9:1-6)

⁷Muri e Isu i gale valai vona e huriki a murimuri vona ala ravulu a polona i rua, i rudu tala ria ruarua, i habi a nitora ne ria ni lili tala a hanitu. ⁸^aI taki ria nahea ri gi bole a maki na tahuna ri laho. I uka ma ri gi bole a maki ni kani, a hole, a moni. A maki ri gi bole kunana, a kodo ni laho. ⁹I taki ria ri gi rodo a vahapolo, pali i uka ma ri gi bole a varakia. ¹⁰Muri i ta maea, “Na tahuna mu lakea na ruma tara, mu made vonga ge harena na tahuna mu pe a tanga iea. ¹¹^bA tanga tara i uka ma ri tagui mua, i uka ma ri longo mai mua, mu kurudu pasi a habulo na vahane mua, mu vano. Mu rata mavonga, bara i vakasiri ria ri tahoka a ngava.”

¹²Lakea ri vano, ri vara e huriki ri gi pulo a vilone ria. ¹³^cRi lili tala e huriki a hanitu, ri biri na nibiri e huriki ri giloa, ri vakamahuri ria.

E Ioanes i Mate

(Mateo 14:1-12; Lukas 9:7-9)

¹⁴^dE Herod a hariki i longo a maka maki e Isu i rata, a vuhuna a rane Isu ni lohoka vona pali na tanga lobo. E huriki ranga ri ta maea, “Ra viri iea e Ioanes, a mari ni vahilolo, a Vure i vakamahuri mulea na matenga, lakea i tahoka a nitora ni rata a nivakasiri.”

¹⁵Pali e huriki ranga ri taki ta ia e Elaisa. E huriki ranga ri taki ta ia a propet tara, i manga e huriki a propet hosi. ¹⁶Pali e Herod, na tahuna i longo a ngava nga, i ta maea, “Iau a palakudua hosi a lohona Ioanes, pali ngane i mahuri mule tabu na matenga!” I ta mavonga, a vuhuna ¹⁷⁻²⁰hosi e Herod i parangi vona e Herodias, e girihine tarina e Pilip. Pali e Ioanes i takia e Herod, i ta maea, “I uka ma a vilo na vinara go parangi tabu e girihine tarimu.” E Herodias, i madihi a hatena vona e Ioanes, lakea i ngaru ni rabalakia. Pali i uka dalana, a vuhuna e Herod i mangenge ne Ioanes, i matakaria. I lohoka vona ia a bakovi kamumu,

^z 6:4 Ion 4:44 ^a 6:8-11 Luk 10:4-11 ^b 6:11 Apo 13:51 ^c 6:13 Iak 5:14 ^d 6:14 Mat 16:14; Mrk 8:28; Luk 9:19-20

i kiripiripi a vilona. E Herod i vivi ni longoa a vinara ne Ioanes. Pali na parava ranga bara i loho lege vona a vinara ne Ioanes. Muri i rudu vakuku, ni gi lakavu e Ioanes, ni gi kolotata, ni gi ru dili na bavi.

²¹Muri e Herodias i maragisi vona a maki i ngarua. Na parava ni poda vona e Herod, e Herod i ratea a habu, i gale palupu e huriki a bolekoru vona, a ubu na tara vona, a bakovi dagi o Galili, ri gi valai na habu. ²²E tune Herodias a ngatavine i dili, i raulo, i rata e Herod turana e huriki ri valai na habu vona ri vivi. Lakea a hariki i takia a koma ngatavine, “A ra maki o ngarua bara habia vomu.” ²³Muri i kaba i ta maea, “A ra maki o nana vona, bara habia vomu. A tabeke na harikianga nau tara bara habia.”

²⁴A koma ngatavine i pagitala i nanea e kinana, “A ra maki ga nana vona?”

E kinana i koli, i ta maea, “O nana vona a gine Ioanes, a Mari ni Vahilolo.”

²⁵A koma ngatavine i malaviriri kunana, i laho hari dili mai a hariki, i ta maea, “A ngaru go palakudua a lohone Ioanes a mari ni vahilolo. Muri o habia nau a gina.”

²⁶A hariki i lege a lohona, pali i uka ma i ngaru ni ta pupukari vona, a vuhuna i kaba na matane huriki ri bele na habu. ²⁷Lakea i malaviriri kunana i rudua a nugumaheto ge palakudua a lohone Ioanes, ge bole vilia a gina. A bakovi i vano, i palakudu pololilo na bavi a lohone Ioanes. ²⁸I ru lungea na sika, i bole vilia na hariki. Lakea a hariki i habia na koma ngatavine. Muri a koma ngatavine i vano i habia ne kinana. ²⁹E huriki a murimuri ne Ioanes ri longoa a velengana, ri vano, ri bolea a podana, ri tanua.

Pali ngane, e Herod i pahaluhua e Isu ta ia e Ioanes i mahuri mule na matenga.

E Isu i Vakani e Huriki

(Mateo 14:13-21; Lukas 9:10-17; Ioanes 6:1-14)

³⁰E huriki a apostolo ne Isu ri vapopo turane Isu, ri vakalongoa vona a maka maki ri rata, ri tovo e huriki vona. ³¹E huriki ala kupo ri laho viri varola, ri pahakari ria ni kani, lakea e Isu i taki e huriki a apostolo vona, “Mu valai turagu, si gi lakea na hini i ngeki, si gi malo taro vonga.”

³²Lakea ri rike na aga, ri vore lakea na tabeke i ngeki, ta ri gi made kikeri vonga. ³³Pali na tahuna ri vano, e huriki ala kupo ri matai ria, ri matakilala ria, lakea e huriki na tanga lobo ri nunu pololilo, ri bele muga vonga.

^e 6:30 Luk 10:17

³⁴fNa tahuna e Isu i bele, i matai ria, i dodo ria, a vuhuna ri manga a sipsip, i uka matakari ne ria. Lakea i vakatubu ni tovo ria na maki i kupo.

³⁵gI tabalahehe pali a haro, lakea e huriki a murimuri vona ri takia, ri ta maea, “Ra hini nga a tabeke i ngeki, i tabalahehe pali a haro. ³⁶O rudu e huriki, ri gi lakea na robo viliha nga, na maka tanga, ri gi kona a maki ni kani.”

³⁷E Isu i koli, i ta maea, “Mu vakani ria!”

Ri ta maea ria, “A moni ni kona a maki ni kani ne ria vona bara i vatovotovo turana mapana viri i leho na keva i polotolu!^h Pali i uka ma i kamumu si gi kona a maki ni kani ne ria.”

³⁸Lakea i nana ria, “I riva a bret mu tahoka? Mu vano mu matai.”

Ri matai pali, ri hamule, ri vakalongoa e Isu ri ta maea, “A bret i lima, a manu i rua.”

³⁹Lakea e Isu i vakuku e huriki ri gi made vapopo na varili gomagoma. ⁴⁰Ri made vapopo na tara ala ravulu mule ma a murina balaka taku (100) ranga, na tara ala ravulu lima (50) ranga. ⁴¹I bole a bret i lima, a manu i rua, i mata rike na hunu, i kavurikea a Vure. Muri i keve a bret, i habi ne huriki a murimuri vona, ri veru ne huriki. A manu i rua ranga i putu, i veru ne huriki. ⁴²E huriki lobo ri kani, ri maru. ⁴³E huriki a murimuri vona ri tahoni na kulopi i ravulu a polona i rua, a kalavana bret a manu ri kani kaleva. ⁴⁴E huriki a bakovi lobo ri kani ri ala 5,000.

E Isu i Laho Langa na Naru (Mateo 14:22-33; Ioanes 6:16-21)

⁴⁵Malaviriri kunana e Isu i rudu e huriki a murimuri vona, ri gi rike na aga, ri gi muga lakea o Betsaida, na tabeke tara na darilomu. Pali i made mule ia, ge rupolo kamumu e huriki. ⁴⁶iI rupolo lobo e huriki, lakea i sike na gagana lolo, i vasileki. ⁴⁷I rodo ngane a hini, e huriki a murimuri ne Isu ri vore na kurukuruna darilomu. Pali e Isu i tabana na lolo. ⁴⁸I matai e huriki a murimuri vona ri vanugu a vore, a vuhuna a vilu i pori valai muga. Na malabeonga e Isu i pori mai ria, i laho langa na dari. I popote kunana ge rede ria, ⁴⁹jI pali na tahuna ri masia i laho langa na dari, ri pahaluhoi ta ia a hanitu. Lakea ri haloho, ⁵⁰a vuhuna ria lobo ri masia, ri mangenge. I malaviriri kunana i ta maea, “Mu tuhaka! Iau kunana. Naha ni mangenge.”

⁵¹kMuri e Isu i rike na aga, lakea a vilu i pasi puru. Ri turutu hateka, ⁵²a vuhuna i uka ma ri matakilaka vona a nivakasiri e Isu i ratea na bret. I tabana ni uvo a gine ria.

^f 6:34 Gi 27:17; Mat 9:36 ^g 6:35-44 Mrk 8:1-9 ^h 7:37 A denari i 200 i manga a mapana viri ge leho na keva i polotolu. ⁱ 6:46 Luk 5:16 ^j 6:49 Luk 24:37 ^k 6:51 Mrk 4:39

E Isu i Vakamahuri e Huriki o Genesaret
(*Mateo 14:34-36*)

⁵³Ri vore kudu, ri bele o Genesaret, ri hori vonga. ⁵⁴Na tahuna ri raga na aga, e huriki lobo ri matakilalea e Isu. ⁵⁵Ri nunu lae na tabeke vonga, ri vakalongo e huriki. Na tahuna e huriki ri longo, ri kaloho na dede e huriki ri giloa, ri bole lakea vona. ⁵⁶Na tanga lobo e Isu i bele vona, na tanga kiroko, na tanga dagi, polovavo na tanga, bara ri taparaki na mada e huriki ri giloa. Ri taki tora ia ri gi padoi kunanea a harena varakia vona. Pali e huriki lobo ri padoi ia, ri tavaga.

A Maki Kabakaba, a Maki Katoki
(*Mateo 15:1-20*)

7 ¹E huriki a Pariseo turana e huriki a mari na vinara o Ierusalem, ri vano, ri vapopo turane Isu. ²¹Ri matai e huriki a murimuri vona ri kani, i uka ma ri vahilolo taro a limane ria. ³(E huriki a Pariseo, e huriki a Iuda, ri muri mai a vilo hosi ne huriki e tubune ria, ri loi taro a limane ria, muri ri kani. ⁴^mNa tahuna ri hamule na maket, bara ri loi taro a limane ria, muri ri kani. A vilo ranga ne tubune ria ri muri mai, ra ni vahilolo a kikei, a tavila, a ulo).

⁵Lakea e huriki a Pariseo turana e huriki a mari na vinara, ri nanea e Isu, “Re huriki a murimuri vomu, i navai i uka ma ri muri mai a narone huriki e tubune hita hosi, i uka ma ri loi a limane ria muga ni kani?”

⁶“Lakea e Isu i koli ria, i ta maea, “Mua e huriki a ngava naru. I muholi a nitane Isaia a propet na tahuna i taki mua hosi, i here puru maea, ‘Re huriki nga, ri taki ta ri togo iau, pali i uka ma ri ngaru muholi iau na hatene ria.

⁷Ri kavurike tavula iau.

Ri tovo e huriki na vinara tavula na bakovi, ri takia ta a vinara na Vure.’”

⁸Muri e Isu i ta maea tabu, “Mu longotaroa a vinara na Vure, mu ramai a maka vilone huriki e tubune mua. ⁹Mu moro hateka ni marikoi na vinara na Vure, mu gu muri mai kunana a vilo hosi! ¹⁰^oE Moses hosi i here maea, ‘Mu togo e kinane mua, e tamane mua.’ I here maea tabu, ‘E rei a viri i harogi e tamana e kinana ni gi rabalaki.’

¹¹“Pali mu taki a bakovi ge taki e tamana e kinana, ge ta maea, ‘A maki ta ga habi marua, a ru here pali ge ne vona a Vure.’ ¹²Lakea mu hehea nahea ge kori e tamana rua e kinana. ¹³Na naro iea kunana, a vilo hosi ne mua, ra mu tovo polo ne huriki, i ratea a nitana Vure a maki tavula. I kupo a maka maki mu rata mavonga.”

¹ 7:2 Luk 11:38 ^m 7:4 Mat 23:25 ⁿ 7:6-7 Ais 29:13 ^o 7:10 Nim 20:12; 21:17; Vin 5:16

¹⁴E Isu i gale valai tabu e huriki, i taki ria, “Mua lobo, mu talangaki valai, mu longokilalea a nitagu. ¹⁵⁻¹⁶PI uka tara maki ge dili na viri ge ratea ge katoki na matana Vure. A maki i rata a viri ge katoki, a maki i pagitala valai na hatena.”

¹⁷I pe e huriki, i dili na ruma, lakea e huriki a murimuri vona ri ramaia, ri nanea vona a nivakakika iea. ¹⁸Lakea e Isu i taki ria, “Ra mua, i uka ma mu longokilala ma? Ra maki ni kani i uka ma i ratea a viri ge katoki na matana Vure, ¹⁹a vuhuna i uka ma i dili na hatena, i dili kunana na kavutuna, muri i pagitala na kakaina.”

Na ngava iea kunana, e Isu i vakalongo e huriki vona a maki ni kani lobo i kamumu ni kani.

²⁰I ta lokovonga liu, i ta maea, “A maki i pagitala na bakovi, i manga a maki i taki, a maki i rata, i ratea i katoki na matana Vure. ²¹A maki i pagitala na hatena viri, a niluhoi hale, a molenga, a panahoa, a nivarabalaki, a molenga na parangia, ²²a ningutu na maki na viri tara, a nitepu ne huriki lobo, a pusinga, a molenga viliha manga a ligo, a nimasigoro na maki na viri, a nipadimomo, a nigigi tora, a nivarata manga manga tavula. ²³A maka naro hale nga ri pagitala na hatena viri, ri ratea i katoki na matana Vure.”

A Ngatavine o Ponesia

(Mateo 15:21-28)

²⁴Muri e Isu i malaga, i lakea na tabeke ne Tair rua e Sidon. I dili na ruma tara. I koi vona tara viri ge lohoka vona, pali ia, i uka hini ge kapiloho vona. ²⁵A ngatavine tara, e tuna ngatavine i dili vona a hanitu, i longo ta e Isu i bele. Lakea i valai malaviriri, i turume tabukoi ne Isu. ²⁶Ra ngatavine iea, i uka ma a Iuda. Ni poda o Siroponesia. I nana torea e Isu ge lili vurokia a hanitu i dili ne tuna. ²⁷Lakea e Isu i takia, “E huriki a koma ri gi kani taro. I uka ma i kamumu ni gi bole a maki ni kani ne huriki a koma, ni gi voro lakea na ligo.”

²⁸Pali a ngatavine i koli, i ta maea, “Bakovi Dagi o ta muholi. Pali a ligo ranga ri kani poi a momona maki i boru puru na dede ne huriki a koma.”

²⁹Muri e Isu i takia a ngatavine, “O koli kamumu. Pali o hamule. A hanitu i pea pali e tumu.”

³⁰I hamule na tanga, i masia e tuna ngatavine i mahita na kiri, i pagitala pali vona a hanitu.

A Bakovi Vou
(*Mateo 15:29-31*)

³¹E Isu i malaga na tabeke ne Tair, i laho polo ne Sidon, i lokovonga liu na tabeke ne Dekapolis,^q i pagitala na Darilomu e Galili. ³²Na tahuna e Isu i bele vonga, ni tuli valai vona a bakovi i vou, i ngavarubu. Ri taki torea e Isu ge ru langa a limana vona, ge vakamahuria. ³³Lakea e Isu i tuli here lakea na gaga basi ne huriki, i ru dili a kukulimana na tulina bakovi. Muri i kalupe taho a kukulimana i nugua a tabelena bakovi. ³⁴I mata rike na hunu, i taravango i ta maea, “Epata!” I manga i maea, “Ge mapaga.”

³⁵I uka ma i tabaka, i kamumu a tulina, i longo a hini, i vakatubu ni ta kavakava. ³⁶Lakea e Isu i taki tora ria, nahea ri gi vakalongoa tara viri. I taki tora ria nahea ri gi vakalongo lae. Pali ri vano ria, ri vakalongo lae.

³⁷Ri turutu hateka, lakea ri ta maea, “A maki lobo i rata kamumu. I rata e huriki ri vou ri longo, i rata e huriki ri ngavarubu ri ta.”

E Isu i Vakani e Huriki ala Rangale Va
(*Mateo 15:32-39*)

8 ¹Na tahuna iea e huriki ala kupo ri vapopo tabu. Ri uka a maki ni kani, lakea e Isu i gale e huriki a murimuri vona, i taki ria, ²“Iau a dodo e huriki nga. Ri made turagu na parava i tolu pali. I uka ma ri kani. ³Pali ngane a koi ni rudu hamule ria, ma ga ri gi vitolo, ge vurea a matane ria na dala. E huriki ranga ri valai basi hateka.”

⁴E huriki a murimuri vona ri koli ri ta maea, “Pali si gi bole vai na tabeke i ngeki koea a maki ni kani si gi vakani e huriki nga vona?”

⁵Lakea e Isu i nana ria, “I riva a bret mu tahoka?”

Ri ta maea ria, “Mi tahoka a bret i polorua.”

⁶Lakea i taki e huriki ri gi made puru na malala. I bole a bret i polorua nga, i kavurikea a Vure. Muri i keve, i habi ne huriki a murimuri vona, ri gi veru tala ne huriki.

⁷A manu kiroko ranga ri tahoka. Ngi ranga i bole, i kavurikea a Vure, muri i taki e huriki a murimuri ri gi veru tala. ⁸Ri kani, ri maru. Muri ri tahoni dili na kulopi i polorua a kalavana maki ni kani, ri vonu. ⁹E huriki ri kani ri ala rangale va (4,000). Ri kani lobo muri i rupolo ria. ¹⁰Malaviriri kunana i rike na aga turana e huriki a murimuri vona, ri lakea na tabeke ne Dalmanuta.

¹¹Na tahuna ri bele o Dalmanuta, e huriki a Pariseo ri valai, ri vakatubu ni hehea e Isu. Ri tonia, ri nanea ge rata a nivakasiri ge

^q 7:31 A ngava e ‘Dekapolis’ i manga i maea, ‘A Tanga i Ravulu.’ ^r 7:36 Mrk 1:43-45

^s 7:37 Ais 35:5 ^t 8:1-9 Mrk 6:35-44

vakasiria a nitora vona i valai na Vure. ¹²“E Isu i kide tala, i ta maea, “I navai e huriki na tahuna mona ri nana ni matai a nivakasiri? A taki muholi mua, bara i uka tara nivakasiri ri gi masia.”

¹³Muri i pe ria, i rike na aga, i lakea na tabeke tara na darilomu.

A Is ne Huriki a Pariseo

(Mateo 16:5-12)

¹⁴E huriki a murimuri ri longo kaburungi ni bolena bret. Ri tahoka kunana a bret i taku na aga. ¹⁵“E Isu i taki tora ria, “Mu lelerau, mu matadoko vona a is ne huriki a Pariseo, a is ne Herod.”

¹⁶Lakea ri vakatubu ni vata vona a hini ri uka bret. ¹⁷“E Isu i lohoka vona a maki ri vata vona, lakea i nana ria, “I navai mu vata vona a bret i uka ma mu bole? Mua, i uka ma mu matakilala iau, i uka ma mu longokilala a ngava. I navai i uvo a gine mua? ¹⁸Mua mu tahoka a matane mua, pali i uka ma mu matai. Mu tahoka a tuline mua, pali i uka ma mu longokilala. Pali mua, i uka ma mu luhoi mule a maki a rata? ¹⁹“Na tahuna a keve a bret i lima, a vakani e huriki ala 5,000, i riva a kulopi mu tahoni dili vona a kalavana maki ni kani?”

Ri koli ri ta maea, “A kulopi i ravulu a polona i rua.”

²⁰“Na tahuna a keve a bret i polorua a vakani e huriki ala 4,000, pali i riva a kulopi mu tahoni dili vona a kalavana maki ni kani?”

Ri koli ri ta maea, “I polo rua.”

²¹Lakea e Isu i nana ria, “Pali i navai i uka ma mu matakilaka vona a maka maki a rata?”

A Kepa o Betsaida

²²Ri bele o Betsaida, lakea e huriki ranga ri tuli vilia ne Isu a bakovi i kepa, ri taki torea e Isu ge padoi ia. ²³Lakea e Isu e tuli talea na tanga a kepa. I kalupe taho a matana, i ru langa a limana vona, muri i nanea, “O matai a maki o i uka?”

²⁴A bakovi i mata lae, i ta maea, “A matai e huriki a bakovi, ri manga a kai ri laho lae.”

²⁵Lakea e Isu i padoi tabu a matana bakovi. Muri a matana i matapara, i matakilala lobo a maka maki. ²⁶Muri e Isu i rudua ge hamule lakea na ruma vona, i takia, “Naha ni dili na tanga.”

E Petrus i Taki Tala a Niluhoi Vona

(Mateo 16:13-20; Lukas 9:18-21)

²⁷E Isu turana e huriki a murimuri vona ri lakea na maka tanga kiroko tabukoi na tanga dagi e Sisaria Pilipi. Na tahuna ri lalaho lokovonga, e Isu i nana ria, “E huriki ri luhoi iau ge iau e rei?”

^u 8:12 Mat 12:39; Luk 11:29 ^v 8:15 Luk 12:1 ^w 8:17 Mrk 6:52 ^x 8:19 Mrk 6:41-44

28^yRi ta maea ria, “E huriki ranga ri taki ioe, ta ioe e Ioanes a mari ni vahilolo. I ranga ri taki ioe, ta ioe e Elaia. Pali e huriki ranga tabu ri taki ioe, ta ioe a propet hosi tara.”

29^zLakea e Isu i nanea e Petrus, “Pali ioe, o luhoi iau ge iau e rei?”

E Petrus i koli, i ta maea, “Ioe e Kristo.”^a

30^bPali e Isu i taki tora ria nahea ri gi vakalongoa tara viri.

E Isu i Taki Muga a Matenga Vona

(Mateo 16:21-28; Lukas 9:22-27)

31Muri e Isu i vakatubu ni vara ria na Tuna Bakovi bara i bole a nimadihi i kupo. E huriki a gare, a prister dagi, a mari na vinara bara ri marikoi vona. Muri bara ri rabalakia. Pali muri na parava i tolu, bara i pesi rike mule na matenga. 32I vara kavakava kunana vona ra ngava iea. Pali e Petrus i tulia lakea na gaga, i vakatubu ni tahatea.

33E Isu i ngalahere ne Petrus, i mata lakea ne huriki a murimuri vona, i tahatea e Petrus, i ta maea, “Satan, o hamule mae a bitogu! I uka ma o luhoi a maki na Vure. O luhoi kunana a maki na bakovi.”

34^cMuri i gale valai vona e huriki ri turana, turana e huriki a murimuri vona, i taki ria, “E rei a viri i ngaru ni muri nau, ge lohopile a ningaru vona, ge kalohoa a kai tavalavala vona, ge ramai iau. 35E rei a viri i ha taro iau, ne vona ni korimule a kulina, bara ri velu. Pali e rei a viri i mate a vuhuna i ramai iau, i vara a Velenga Kamumu, bara i bole a nimahuri vakaroro. 36A ra i kamumu vona a bakovi ge bole lobo a maka maki na malala, pali ge mate ia? 37Pali a bakovi, a ra ge habia ge ngulia vona a nimahuri? 38^dKoea na malala ri rata hateka a molenga, a naro hale. Pali e rei a viri i maruhu nau, i maruhu na ngava nau ngane, a Tuna Bakovi bara i maruhu vona muri ma, na tahuna i valai na nipara ne Tamana, turana e huriki a agelo vona.”

9^e 1^eMuri i taki ria i ta maea, “A taki muholi mua, i ranga ne mua mu pesi koea ngane, i uka ma mu gu mate ma, bara mu masia a harikianga na Vure ge valai turana nitara.”

A Kakaine Isu i Mareli

(Mateo 17:1-13; Lukas 9:28-36)

2^fMuri na parava i polotara e Isu i tuli kunana e Petrus, e Iakop, e Ioanes, to sike na lolo dagi. Na tahuna to made vonga, e Isu i mareli na matane tou. 3A varakia vona i para hateka, i kea hateka. I uka tara viri na malala ge ratea tara varakia ge kea maea. 4Muri e Elaia e Moses ru

^y 8:28 Mrk 6:15 ^z 8:29 Ion 6:68-69 ^a 8:29 A ngava e ‘Kristo’ i manga i maea, ‘A viri a Vure i vulakia.’ ^b 8:30 Mrk 9:9 ^c 8:34 Mat 10:38-39; Luk 14:27 ^d 8:38 Mat 10:33
^e 9:1 Mrk 13:30 ^f 9:2-7 Apo 3:22; 2Pe 1:17-18

bele vakaturutu, ru ta turane Isu. ⁵Lakea e Petrus i takia e Isu, “Mari ni tovo, i kamumu hateka te valai koea. Mete ge hae a kape ge tolu, ne vomu tara, ne Moses tara, ne Elaisa tara.” ⁶E Petrus i ta tavulavula, a vuhuna to mangenge hateka. ⁷Muri a bubu i valai i kavitagau tou. To longoa a ngava i pagitala na bubu i ta maea, “Ra bakovi iea e tugu, a hategu. Moto longo maia a nitana.”

⁸Na tahuna to mata viliha lae, to turutu, i uka ma to matai ranga a viri. E Isu kunana i pepesi vonga.

⁹Na tahuna to laho puru, e Isu i taki tora tou nahea to go vakalongoa tara viri, to go mangulu mavonga ge harena na tahuna a Tuna Bakovi ge pesi rike mule na matenga. ¹⁰To ruhuloloa ne tou a ngava, lakea to vanana vona ra ngava ge “pesi rike mule na matenga,” i navai tavulai.

¹¹^gMuri to nanea, “I navai e huriki a mari na vinara ri takia e Elaisa ta ge valai muga?”

¹²^hE Isu i koli i ta maea, “I muholi, i takia e Elaisa ge valai muga, ge rata karaba a maki lobo. Pali ge navai ra nita ni here puru muga i taki a Tuna Bakovi bara i bole a nimadihi hateka, e huriki lobo ri gi marikoi vona? ¹³ⁱA taki mua, e Elaisa i valai pali. Ri rata virihia vona a maki lobo ri ngaru ri gi rata virihia vona, i muri mai a ngava ni here puru hosi.”

A Riau i Dili Vona a Hanitu (*Mateo 17:14-21; Lukas 9:37-43*)

¹⁴Na tahuna e Isu, e Petrus, e Iakop, e Ioanes to bele taho e huriki a murimuri ranga, to matai e huriki ala kupo ri vapopo halui ria. E huriki a mari na vinara ri vahehe turana e huriki a murimuri. ¹⁵Na tahuna e huriki ri vapesihi ri masia e Isu i bele, ri vivi vona, lakea ri nunu lokovonga, ri gi taguia. ¹⁶Lakea e Isu i nana ria, “A ra mu vahehe vona?”

¹⁷A bakovi tara i koli i ta maea, “Mari ni tovo, a tuli vilia vomu e tugu a bakovi. I dili vona a hanitu i ratea i ngavarubu. ¹⁸Na parava ranga a hanitu i ratea i boru puru na malala. I bubu vona a vere a ngavana, i vaheri a ngina, i katoro ia. Iau a taki e huriki a murimuri vomu ta ri gi lili talea a hanitu, pali ri keru.”

¹⁹Lakea e Isu i koli, i ta maea, “Mua e huriki na tahuna mona, i uka ma mu luhoi torea a Vure. Ge navai? Ga hatenono mavonga ni dava mua, mu gu luhoi tora iau?” Muri i takia a bakovi iea, i ta maea, “O tuli vilia e tumu.”

²⁰Lakea ri tuli vilia vona. Na tahuna a hanitu i masia e Isu, i malaviriri kunana i ratea a ria i tangitoru. I boru puru na malala, i tohi lae, i bubu vona a vere a ngavana. ²¹Lakea e Isu i nanea e tamana koma, “Garika i tubu vona a gilanga iea?”

^g 9:11 Mal 3:1 ^h 9:12 Sng 22:1-18; Ais 53:3; Mal 4:5-6 ⁱ 9:13 Mat 11:14

E tamana i koli i ta maea, “I tubu na tahuna i kiroko vona. ²²I balaka kupo a hanitu i voro rikea na kanono, i voro purua na naru ta ge rabalakia. Pali ioe bara o kara ni ratea tara maki, o dodo maria o kori maria.”

²³^jLakea e Isu i ta maea, “I navai o ta maea, ‘Pali ioe bara o kara?’ A maki lobo a maki tavula na viri i luhoi tora iau.”

²⁴E tamana i malaviriri kunana i koli, i ta maea, “A luhoi tora ioe, pali o tuhori iau na tahuna i uka ma a luhoi tora ioe!”

²⁵Na tahuna e Isu i matai e huriki ri nunu valai tabukoi ne ria, i tahatea a hanitu i ta maea, “Ioe a hanitu voupatuli, a ngavarubu, a taki tora ioe, o pagitala vona, naha ni dili tabu vona.”

²⁶^kLakea a hanitu i haloho, i ratea a koma i tangi torutoru, muri i pagitala vona. A koma ngane i mata manga i mate, lakea e huriki ri ta maea, “I mate pali.” ²⁷Pali e Isu i lokovonga, i nugua a limana i tuli pesia. ²⁸Na tahuna e Isu i dili na ruma, e huriki a murimuri vona ri nana kapiloho ia, “I navai mi keri ni lili talea a hanitu iea?”

²⁹E Isu i koli, “A hanitu maea, i uka ma ge pagitala tavula. Mu vasileki, mu peremu taro, muri bara i pagitala.”

E Isu i Vakalongo Muga a Nimatena

(Mateo 17:22-23; Lukas 9:43)

³⁰^lMuri ri pe a hini ngi, ri laho polo vona e Galili. E Isu i uka ma i ngaru e huriki ri gi lohoka vona a hini ri made vona, ³¹^ma vuhuna i tovo e huriki a murimuri vona. I taki ria, i ta maea, “A Tuna Bakovi bara ni habi na limane huriki a bakovi, ri gi rabalakia. Muri na parava i tolu bara i pesi rike mule na nimate.” ³²ⁿI uka ma ri longokilalea a pelegona ngava, pali ri mangenge ni nanea e Isu.

E Rei Ge Muga

(Mateo 18:1-5; Lukas 9:46-48)

³³Ri lakea na tanga e Kapernaum. Na tahuna ri made na ruma tara, lakea e Isu i nana e huriki a murimuri vona, “A ra maki mu vata vona na dala?”

³⁴Pali ri mangaulu kunana, a vuhuna ri vanana vona na dala, ne rei ne ria i dagi hateka. ³⁵^oLakea e Isu i made puru i gale lokovonga vona e huriki a murimuri ala ravulu a polona i rua, i taki ria, “E rei i ngaru ni muga, ge ia a iku, a vora ne huriki lobo.” ³⁶Muri i vakapesia na kurukurune ria a koma kiroko. I boko rikea, i taki ria, ³⁷^p“E rei a viri i tagui a koma kiroko maea na ragu, i tagui iau. E rei a viri i tagui iau, i taguia ra viri i rudu iau a valai.”

^j 9:23 Mat 21:21; Mrk 11:23 ^k 9:26 Mrk 1:26 ^l 9:30 Ion 7:1 ^m 9:31 Mrk 8:31; 10:32-34
ⁿ 9:32 Luk 9:45 ^o 9:35 Mat 20:25-27; Mrk 10:43-44; Luk 22:24-26 ^p 9:37 Mat 10:40

³⁸Muri e Ioanes i ta maea, “Mari ni tovo, mi masia tara bakovi i lili tala a hanitu na ramu, lakea mi takia nahea ge rata tabua a naro iea, a vuhuna i uka ma ia e turane hita.”

³⁹Pali e Isu i taki ria i ta maea, “Naha ni hatekakaria. I uka tara viri i rata a nivakasiri na ragu muri ge pagepolo ge ta hale nau. ⁴⁰^qA viri i uka ma i rata hale hita, ia e turane hita. ⁴¹^rA taki muholi mua, e rei a viri i habi a naru ne mua na ragu a vuhuna mua a tara ne Kristo, muholi hateka bara i bole a mapana.

A Naro Hale i Vakahale a Niluhoi

(Mateo 18:6-9; Lukas 17:1-2)

⁴²“Pali e rei a viri ge ratea a koma kiroko maea, ra i luhoi tora iau, ge dili na naro hale, bara i kamumu hateka ni gi topi na lohona a kedo dagi, ni gi voro puru na utu, ge pasiri. ⁴³⁻⁴⁴^sA limamu tara ge rata ioe go rata a rabu hale, o palakudua o vurokia, ma go puru na kanono i uka ma i mate kilala turana limamu i rua. I kamumu bara o tahoka a limamu i taku kunana, o bole a nimahuri vakaroro. ⁴⁵⁻⁴⁶A vahamu ge rata ioe go rata a rabu hale, o palakudua, o vurokia, ma ni gi voro puru ioe na kanono turana vahamu i rua. I kamumu bara o tahoka a vahamu i taku kunana, o bole a nimahuri vakaroro. ⁴⁷^tPali a matamu tara ge rata ioe go rata a rabu hale, o sigi talea, ma ni gi voro puru ioe na kanono turana matamu i rua. I kamumu bara o tahoka a matamu i taku kunana, o dili na harikianga na Vure. ⁴⁸^uRa tanga na kanono iea,

‘a maka mata kiroko ri pidi lae na kakaine huriki, i uka ma ri mate kilala.

Pali a kanono tara i uka ma ge mate.’

⁴⁹“E huriki a prister ri ru a sol na maka nihabi, ne vona ni rata a nihabi ge malamala na matana Vure. I mavonga kunana, a kanono ge bele ne huriki lobo.

⁵⁰^v“A sol a maki kamumu. Pali ge lobo a namina, mu gu rata navia ge tahoka a namina tabu? Mu nami manga a sol, mu vakabele a nivalemu ne huriki ri luhoi tora iau.”

A Nivapile na Parangia

(Mateo 19:1-12; Lukas 16:18)

10 ¹Muri e Isu i pea a tanga iea, i tulu poloa a naru e Iordan, i lakea na robo e Iudea. I mavonga tabu e huriki lobo ri lakea vona, i vara ria, i manga a hini i rata vakaroro. ²E huriki a Pariseo ranga ri valai ri gi tonia. Ri nanea, “A vinara i ta navai? A bakovi ge pilea e girihina, o i uka?”

^q 9:40 Mat 12:30; Luk 11:23 ^r 9:41 Mat 10:42 ^s 9:43-44 Mat 5:30 ^t 9:47 Mat 5:29

^u 9:48 Ais 66:24 ^v 9:50 Mat 5:13; Luk 14:34

³E Isu i koli, i nana raia, “Pali e Moses hosi i taki navai mua?”

⁴“Ri ta maea ria, “Hosi e Moses i longo ne huriki e tubune mia, i taki a bakovi bara i habia ne girihina a raukea na nivapile, muri bara i tonoa ge vano.”

⁵I koli ria, i ta maea, “E Moses i rata mavonga a vuhuna mu gigi tora hateka, lakea i here purua ra vinara iea. ⁶“Pali na tahuna a Vure i ratarike a maki lobo, ‘I ratarike varago a bakovi a ngatavine.’ ⁷“I mavonga, a bakovi bara i pe e tamana e kinana, i madoko turane girihina, ⁸a kakaine rua ge taku kunana.’

“Ngane i uka ma ru ala rua, ru ala taku kunana. ⁹I mavonga kunana, ra maki a Vure i varomu palupu, i uka tara viri ge pugea.”

¹⁰Na tahuna ri made tabu na ruma, e huriki a murimuri ri nanea e Isu vona ra ngava i takia. ¹¹“I koli i ta maea, “A bakovi i pilea e girihina, i parangi tabu a ngatavine tara, ra bakovi iea i mole, i rata halea e girihina. ¹²A ngatavine bara i pilea e girihina, i parangi na bakovi tara, ra ngatavine iea i mole.”

E Isu i Ngaru e Huriki a Koma Kiroko

(Mateo 19:13-15; Lukas 18:15-17)

¹³Ni tuli lakea ne Isu e huriki a koma kiroko, ge ru langa a limana ne ria. Pali e huriki a murimuri ri tahate ria. ¹⁴Na tahuna e Isu i matai a naro ri rata, i madihi a hatena, i taki ria, “Naha ni hatekakari e huriki a koma. Mu taparaki ria ri gi valai nau, a vuhuna a harikianga na hunu ne vone ria e huriki a hulu nga. ¹⁵“A taki muholi mua, e rei a viri i uka ma i ngaru a Harikianga na Vure ge manga e huriki a koma nga, i uka ma ge dili vona.” ¹⁶Muri i boko rike e huriki a koma, i ru langa a limana ne ria, i gamai ria.

A Riau na Mahala

(Mateo 19:16-30; Lukas 18:18-30)

¹⁷Na tahuna e Isu i pesi rike i vakatubu ni laho, a bakovi tara i nunu lakea vona, i turume puru na ngalana. I nanea e Isu i ta maea, “Mari ni tovo, o kamumu hateka. A ra maki ga ratea ga bole a nimahuri vakaroro?”

¹⁸Lakea e Isu i ta maea, “I navai o taki iau a kamumu? I uka tara viri ge kamumu. A Vure kikeri kunana a viri i kamumu. ¹⁹“O lohoka vona a vinara nga, ‘Naha ni rabalaki a viri, naha ni mole, naha ni panaho, naha ni padi virihi tavula a viri na ngava, naha ni marikau, o togo e tamamu e kinamu.’”

^w 10:4 Vin 24:1-4; Mat 5:31 ^x 10:6 Vuh 1:27; 5:2 ^y 10:7-8 Vuh 2:24; Epe 5:31-33

^z 10:11 Mat 5:32 ^a 10:15 Mat 18:3 ^b 10:19 Nim 20:12-17; Vin 5:16-20

²⁰Lakea i vakalongoa e Isu i ta maea, “Mari ni tovo, na tahuna a kiroko vona i valai i harena mona, a muri mai lobo a vinara nga.”

²¹E Isu i matanonoa, i ngaru hatekea, lakea i takia, “A maki tara i uka ma o ratea ma. O vano o habi a maki lobo vomu ni gi kona. O bole a mapana o habi ne huriki a matasia, bara o tahoka a mahala na hunu. Muri o valai o muri nau.”

²²Na tahuna i longoa a ngava iea, i mata kumamu. I pesi rike i vano, i dodo hateka, a vuhuna i tahoka hateka a mahala. ²³Lakea e Isu i matanono e huriki a murimuri vona, i taki ria, “I madihi hateka ne huriki a bakovi na mahala ri gi dili na harikianga na Vure!”

²⁴E huriki a murimuri ri turutu vona a ngava iea. Pali e Isu i ta tabu, i ta maea, “Mua e huriki e tugu, i madihi hateka ne huriki a bakovi na mahala ri gi dili na harikianga na Vure! ²⁵A kamel i keru ni dili na dupi na kavato. I mavonga kunana, a bakovi na mahala i uka ma ge dili na harikianga na Vure.”

²⁶Ri turutu hateka, lakea ri vanana mule ne ria, “Pali e rei ngane ge bole a nimahuri vakaroro?”

²⁷E Isu i matanono ria, i taki ria, “A bakovi kunana i keru. Pali a Vure i uka ma ge keru. A maki lobo a maki tavula na Vure.”

²⁸Lakea e Petrus i ta maea, “Mia mi pe lobo a maka maki ne mia, mi muri mai ioe!”

²⁹E Isu i koli, i ta maea, “A taki muholi mua, e huriki lobo ri luhoi tora iau, ri longo mai a Velenga Kamumu nau, lakea ri pe a tanga ne ria, e turane ria, e kurabane ria, e kinane ria, e tamane ria, e tune ria, a hania ne ria ³⁰bara ri bole balaka kupo tabu koea na malala. Bara ri bole a maka tanga i kupo, e turane ria i kupo, e kurabane ria i kupo, e kinane ria i kupo, e tune ria i kupo, a hania ne ria i kupo. A maka nimadihi ranga bara ri bole i kupo. Pali na tahuna muri ma, bara ri bole a nimahuri vakaroro. ³¹^cI kupo e huriki ri muga ngane, bara ria a iku. Pali i kupo e huriki ri iku ngane, bara ri muga.”

E Isu i Ta Muga na Nimatena (*Mateo 20:17-19; Lukas 18:31-34*)

³²^dE Isu i muga ria, ri laho sike o Ierusalem. E huriki a murimuri vona ri turutu, pali e huriki ri muri ne ria, ri mangenge. Lakea e Isu i tuli tabu lakea na gaga e huriki a murimuri vona ala ravulu a polona i rua, i taki ria vona a maki ge bele vona. ³³I taki ria i ta maea, “Mu longo. Ngane si gi sike o Ierusalem. A Tuna Bakovi bara ni habi na limane huriki a prister dagi, a mari na vinara. Bara ri taki ia ni gi rabalaki, muri bara ni habi lakea ne huriki a bakovi i uka ma ria a Iuda. ³⁴Bara ri padikedea, ri

^c 10:31 Mat 20:16; Luk 13:30 ^d 10:32-34 Mrk 8:31; 9:31

kalupe tahoā, ri lagua, ri rabalakia. Muri na parava i tolu, bara i mahuri mule.”

E Iakop e Ioanes Ru Ngaru ni Muga
(*Mateo 20:20-28*)

³⁵Muri e tune Sebedi ala rua, e Iakop e Ioanes, ru lakea ne Isu, ru ta maea, “Mari ni tovo, o habi ne maria a maki miri ngaru.”

³⁶Lakea e Isu i nana rua, “A ra muru ngarua?”

³⁷Ru koli, ru ta maea, “Na tahuna o hamule valai tabu na bagetuanga, miri ngaru ge made na kanemu tara, na maurimu tara.”

³⁸^eLakea e Isu i ta maea, “I uka ma muru lohoka vona a ngava muru takia. Ra marua, muru kara ni bolena a nimadihi a tabukoi ga bolea? Muru kara ni mate manga iau a tabukoi ga mate?”

³⁹^fRu ta maea, “Miri kara.”

Lakea e Isu i taki rua i ta maea, “Muholi muru gu bole a nimadihi turagu. Muru gu mate manga iau. ⁴⁰Pali ni made na kanegu tara, na maurigu tara, i uka ma a maki nau ga habi. A Vure i kisi puru ra tabeke nga, i tahoka a tahona bara ru made vona.”

⁴¹Na tahuna e huriki a murimuri ala ravulu ri longo a ngava ru taki, i madihi a hatene ria. ⁴²^gLakea e Isu i gale palupu ria i taki ria, “Mu lohoka vona e huriki a matakari ne huriki i uka ma ria a Iuda, ri bibi rike mule ria. E huriki a bakovi tora ne ria ri matakari hateka ria. ⁴³^hPali mua, i uka ma mu gu rata mavonga. E rei ne mua i ngaru ge ia a viri dagi, ge ia a vora ne mua. ⁴⁴E rei ne mua i ngaru ni muga, ge ia a vora ne huriki lobo. ⁴⁵I mavonga a vuhuna a Tuna Bakovi i uka ma i valai ni gi vora vona. I valai ge ia a vora, ge mate, ge korimule huriki ala kupo.”

E Isu i Vakamataparea e Bartimeus
(*Mateo 20:29-34; Lukas 18:35-43*)

⁴⁶Muri ri bele o Ieriko. E Isu turane huriki a murimuri vona, turana e huriki ala kupo, ta ri gi pe a tanga dagi. A bakovi i kepa, a rana e Bartimeus (i manga “e tune Timeus”) i mamade na dahana dala, i nonongi a maki. ⁴⁷Na tahuna a bakovi iea i longoā e Isu o Nasaret i polo, i vakatubu ni gale dagi, i ta maea, “Isu, Tune Davit, o dodo iau!” ⁴⁸E huriki ala kupo ri tahatea, ri takia ge vulai, pali i gale dagi hateka, i ta maea, “O Tune Davit, o dodo iau!”

⁴⁹Lakea e Isu i pesi tata, i ta maea, “Mu tuli vilia.”

Ri takia a kepa, ri ta maea, “O vivi! O pesi rike! E Isu i gale ioe.”

⁵⁰I puri purua a kala i kavitagua a bitona vona, i pesi rike, i lakea ne Isu. ⁵¹Lakea e Isu i nanea, “A ra o ngarua ga ratea?”

^e 10:38 Mrk 14:36; Luk 12:50 ^f 10:39 Apo 12:2; Kap 1:9 ^g 10:42 Luk 22:25-26

^h 10:43 Mat 23:11; Mrk 9:35

A kepa i ta maea, “Mari ni tovo, a ngaru ni matapara.”

⁵² Lakea e Isu i ta maea, “O vano, o matapara a vuhuna o luhoi tora iau.” I malaviriri kunana i matapara, i ramaia e Isu.

E Isu i Dili o Ierusalem

(Mateo 21:1-11; Lukas 19:28-40; Ioanes 12:12-19)

11 ¹E Isu turana e huriki a murimuri vona, ri valai tabukoi o Ierusalem. Ri bele na tanga e Betpage, e Betani, na dahana lolo e Oliva. Lakea e Isu i rudu a murimuri vona ala rua, ²i taki rua i ta maea, “Muru muga lakea na tanga na ngalane marua. Na tahuna muru dili na tanga, bara muru masia a donki karaba ni topi, i uka tara viri ge rike vona ma. Muru pugea, muru lalu vilia. ³A viri tara ge nana, ‘I navai muru pugea a donki iea?’ Muru takia, ‘A Bakovi Dagi i tahoka a leho vona. I uka ma ge tabaka, bara i taparaki mulea.’”

⁴Lakea ru vano, ru masia a donki karaba ni kolotata na dahana mataruma tabukoi na dala. Na tahuna ru pugea, ⁵e huriki a bakovi ranga ri pesi vonga, ri nana rua, “A ra muru ratea? I navai muru pugea a donki karaba?”

⁶Lakea ru koli manga a ngava e Isu i taki rua vona. Ri longo ne rua, ru vano. ⁷Ru lalua a tuna donki lakea ne Isu. Ru vulala rike vona a nirodo ne rua, lakea e Isu i made langa vona. ⁸E huriki ala kupo ri vulala puru na dala a nirodo ne ria, pali ranga ri putu a pagana rou na hania, ri vahata. ⁹E huriki ri muga, e huriki ri muri, ri lahihi rike, ri ta maea, “Si gi kavurikea a Vure!

Ni gi kavurike a viri i valai na rane Bakovi Dagi.

¹⁰ Ni gi kavurike a harikia ne tamane hita, e Davit, i valai ngane.

Si gi kavurikea a Vure Meli Liu!”

¹¹E Isu i bele o Ierusalem, muri i lakea na roho na Vure. I laho vonga, i matai a maki lobo. Muri i tuli a murimuri vona ala ravulu a polona i rua, ri lakea o Betani a vuhuna i malunga liu pali a hini.

¹²Na parava muri ri pea e Betani, ri vano. E Isu i vitolo, ¹³^klakea i mata muga, i masia a kai a pik i buroro a pagana. Lakea i vano ge masia, i vona a kanena, o i uka. I bele vona, i masia i uka kanena. A pagana kunana, a vuhuna i uka ma a tahuna na kai a pik ge vua vona. ¹⁴Lakea i takia a kai, i ta maea, “I uka tara viri ge kani tabu a vuamu.” E huriki a murimuri vona ri longoa ra ngava i takia.

E Isu i Lili Tala e Huriki na Roho na Vure

(Mateo 21:12-17; Lukas 19:45-48; Ioanes 2:13-22)

¹⁵Na tahuna ri bele o Ierusalem, e Isu i dili na tabeke na roho na Vure, i lili tala e huriki ri vakona, ri vahabi a maki. I pulo a dede ne huriki

ⁱ 10:52 Mrk 5:34 ^j 11:9 Sng 118:25-26 ^k 11:13 Luk 13:6

ri vangoli a moni, a gula ne huriki ri vahabi a balu. ¹⁶I ta pupukari ria vona, nahea ri gi kaloho a popou, ri gi dili na tabeke na roho na Vure. ¹⁷Lakea i vara ria, i ta maea, “A ngava ni here puru na Hinere i ta maea, ‘A roho nau ne vona e huriki a bakovi na tanga lobo ri gi vasileki vona.’

Pali mua mu ratea i manga a hini i haniu vona e huriki a panaho.” ¹⁸E huriki a prister dagi, a mari na vinara, ri longoa, ri vakatubu ni matakanea a dala ri gi rabalaki ia vona. Ri mangenge vona, a vuhuna e huriki lobo ri turutu na vinara vona.

¹⁹Na malunga ri pea a tanga dagi.

²⁰Na hatelanga ri laho lokovonga, ri masia a kai a pik iea i malai liu, i tubu na kana, i rike liu na pagana. ²¹E Petrus i longovisia, lakea i takia e Isu, “Mari ni tovo! Mata lakea! Ra kai a pik o rudurahea, i malai pali!”

²²Isu i koli, i ta maea, “Mu luhoi torea a Vure. ²³”A taki muholi mua, a viri tara bara i takia a lolo iea, ‘O malaga rike, o to na utu.’ pali i uka ma i loho rua, i luhoi torea a maki i taki ge bele, bara i bele. ²⁴”I mavonga, a taki muholi mua, na tahuna mu vasileki, a ra maki mu nana vona, mu luhoi tora manga mu bole pali, bara mu bole. ²⁵”Na tahuna mu vasileki, mu longovisi ranga naro hale ni rata virihi mua vona, mu lohophile, lakea e Tamane mua na hunu tara bara i puga a naro hale ne mua. ²⁶Pali mua, i uka ma mu gu lohophile a naro hale na viri, e Tamane mua, ra i made na hunu, ia tara i uka ma ge puga a naro hale ne mua.”

E Rei i Habi a Nitara ne Isu (Mateo 21:23-27; Lukas 20:1-8)

²⁷E Isu turana e huriki a murimuri vona ri luve tabu o Ierusalem. Na tahuna e Isu i lalaho na roho na Vure, e huriki a prister dagi, a mari na vinara, turana e huriki a gare, ri masia, ri valai vona, ²⁸ri nanea, “O bole vai a nitara o rata a maki nga? E rei i taki ioe go rata a maki nga?”

²⁹E Isu i koli, i ta maea, “Ga nana taro mua. Mua bara mu kolivisia a ninana iea, bara taki mua vona e rei a viri i habia nau a nitara, a rata a maki nga. ³⁰A ninana nau i maea, ra hilova ne Ioanes, i valai na Vure, o i valai na bakovi tavula kunana? Mu vakalongo iau ngane!”

³¹Ri vata, ri ta maea, “Bara si takia a leho vona i valai na Vure, bara i nana, ‘Pali i navai i uka ma mu luhoi tora ia?’ ³²Pali bara si takia a leho vona i valai na bakovi kunana, ra ngava iea tara i uka ma i kamumu.” Ri ta maea a vuhuna ri mangenge ne huriki. E huriki lobo ri luhoia e Ioanes, ta ia a propet. ³³Lakea ri koli, ri ta maea, “I uka ma mi lohoka vona.” Lakea e Isu i ta maea, “Pali iau tara, i uka ma ga taki mua vona e rei a viri i habia nau a nitara ni rata a maki nga.”

¹ 11:17 Ais 56:7; Jer 7:11 ^m 11:18 Mrk 14:1 ⁿ 11:23 Mat 17:20 ^o 11:24 Mat 7:7
^p 11:25 Mat 6:14-15

A Hania na Vain

(Mateo 21:33-46; Lukas 20:9-19)

12 ¹Muri i vakatubu ni taki ria na nita vakakika, i ta maea, “A bakovi tara i varo a vain na hania vona. I tura haluia na nure. I kelia a malala, i kisia ge a hini ni paha bebe a vain vona. I haea a dede langalanga ne vona ni matakari a hania. Muri i habi lakea ne huriki a mari na leho, ri gi leho taro vona. I vano ia, i havai na robo basi. ²I tabukoi ngane a keva ni mirio a vain, lakea i rudua a vora vona, ge lakea ne huriki a mari ni leho ge bole ranga kanena vain. ³Pali ri ubia a vora, ri tonu mulea, i laho a vahana a limana i hamule. ⁴Muri i rudu tabua tara vora. Na tahuna i bele ne ria, ri bikevea a gina, ri harogia. ⁵I rudu tabua tara vora. Na tahuna i bele ne ria, ri rabalakia. Muri i rudu lokovonga e huriki a vora ala kupo. Lakea ri ubi ranga, ri bimate ranga. ⁶Pali a bakovi ala taku kunana i tabana, e tuna a hatena. I rudua ngane, a vuhuna i luhoi maea, ‘Bara ri togoa e tugu!’

⁷“Pali e huriki a mari na leho ri varodo a ngava, ri ta maea, ‘Ra bakovi iea bara i bole a murine tamana. Si rabalakia, si gi bolea a hania na vain na tahuna e tamana i mate.’ ⁸‘Lakea ri lakavua, ri bimatea, ri voro talea a podana na hania na vain.

⁹“Pali a ra ge ratea muri ma ra a tahona hania na vain? Bara i vano, i rabalaki e huriki a mari na leho, i habia ne huriki ranga a hania na vain. ¹⁰“Pali i uka ma mu gi hosi ra ngava i tabuli na Hinere? I ta maea,

‘Ra kedo e huriki a mari ni hae a ruma ri marikoi vona,
ngane i bele a vuhu kedo ni hae a ruma vona.

¹¹ E Bakovi Dagi i ratea a maki iea i bele,
i kamumu hateka na matane hita.’ ”

¹²Muri ri matakanea a dala ri gi lakavu e Isu vona, a vuhuna i padi ria a mana vona a nivakakika i ratea. Pali ri mangenge ne huriki, lakea ri pe purua, ri vano.

A Takis ne Kaiser

(Mateo 22:15-22; Lukas 20:20-26)

¹³“Muri ni rudu ranga Pariseo turana ranga bakovi na tara ne Herod, ri gi lakea ne Isu ri gi ratea ge taki ranga ngava, ri gi padi virihi ia vona. ¹⁴Na tahuna ri luve, ri nanea, “Mari ni tovo, mi lohoka vomu, ioe a bakovi ni ta muholi, i uka ma o mangenge vona tara bakovi. O rata a naro i palupulupu vona e huriki a bakovi lobo. O vara kunana na naro na Vure i muri mai a ngava muholi. A vinara i taki si gi habi a takis ne Kaiser, o i uka? ¹⁵Si gi habi o ge uka?”

^q 12:1 Ais 5:1-2 ^r 12:8 Hib 13:12 ^s 12:10-11 Sng 118:22-23 ^t 12:13 Luk 11:53-54

Pali e Isu i lohoka vona a taminga ne ria, lakea i nana ria, “I navai mu ngaru ni toha iau? Mu bole vilia nau tara moni ga masia.”

¹⁶Ri bole vilia vona a moni, lakea i nana ria, “A hanune rei, a rane rei i tabuli vona?”

Ri koli, ri ta maea, “A hanune Kaiser, a rane Kaiser i tabuli vona.”

¹⁷“Muri e Isu i taki ria i ta maea, “Mu habi ne Kaiser a maki ne Kaiser. Mu habi na Vure a maki na Vure.”

Na tahuna ri longoa a ngavana, ri ngapa.

E Huriki a Sadusi

(Mateo 22:23-33; Lukas 20:27-40)

¹⁸“Muri e huriki a Sadusi ri lakea vona. Re huriki nga ri taki ta a viri i mate i uka ma ge pesi rike mule tabu. ¹⁹“Lakea ri nanea, “Mari ni tovo, e Moses i here puru i taki a bakovi i mate, i pe purua e girihina, pali i uka e tune rua, e tarina bara i parangi tabu a havuri vona, ge vakabelea a hamona. ²⁰I tahoka e maki tarina mai ala polorua. A tabua i parangi, muri i mate. Pali i uka ma i vakabele e tuna. ²¹A pahamuri tabua i parangi a havuri vona, muri ia tara i mate, pali i uka tabu e tuna. A tolune ria tara i mavonga. ²²I muholi ngi, ria lobo i uka ma ri vakabele a koma vona. Ri mate lobo, muri a ngatavine i mate. ²³Muri ma, na tahuna e huriki ri pesi rike mule na nimate, ra ngatavine iea ge girihine rei muholi? Ria lobo ri parangi vona.”

²⁴E Isu i koli, i ta maea, “A niluhoi ne mua i varoru, a vuhuna i uka ma mu lohoka vona a Hinere, a nitora na Vure. ²⁵Muri ma, na tahuna e huriki ri gi mahuri mule na matenga, i uka ma ri gi vaparangi. Bara ri made manga e huriki a agelo na hunu. ²⁶“Pali a nitane huriki ri mate pali, ri gi pesi rike tabu, naha ni nana rovi vona. Na hinere ne Moses, a nitana kai kiroko i nono, a Vure i takia e Moses i ta maea, ‘Iau a Vure ne Abraham, ne Isak, ne Iakop.’ ²⁷I uka ma ia a Vure ne huriki ri mate. Ia a Vure ne huriki ri mahuri. A niluhoi mua i varoru hateka!”

A Vinara Dagi Hateka

(Mateo 22:34-40; Lukas 10:25-28)

²⁸“A bakovi tara, a mari na vinara i valai, i longo e huriki a Sadusi ri varata na ngava turane Isu. I longoa e Isu i koli kamumu a maka ninana, lakea i nanea, “Na maka vinara lobo, e rei a vinara i dagi hateka?”

²⁹“E Isu i koli, i ta maea, “A ngava dagi hateka ra iea, ‘Mua e huriki a Israel mu longo! E Bakovi Dagi a Vure ne hita, ia kunana e Bakovi Dagi. ³⁰O ngarua e Bakovi Dagi a Vure vomu na hatemu lobo, na hanumu lobo,

^u 12:17 Rom 13:7 ^v 12:18 Apo 23:8 ^w 12:19 Vin 25:5 ^x 12:26 Nim 3:2,6

^y 12:28 Luk 10:25-28 ^z 12:29-30 Vin 6:4-5

na niluhoi vomu lobo. O ngaru hatekea na nitora lobo vomu.’ ³¹“A ruana i maea, ‘O ngarua e turamu i manga a hini o ngaru mule ioe.’ I uka tara vinara ge dagi vona a vinara nga.”

³²A bakovi i koli, i ta maea, “Mari ni tovo, o ta muholi. I muholi a ngava o taki, a Vure i taku kunana, i uka viri tara tabu. ³³^bSi gi ngarua na hatene hita lobo, na niluhoi ne hita lobo, na nitora ne hita lobo. Si gi ngaru e huriki lobo i manga a hini si ngaru mule hita. Ra vinara nga i dagi hateka na maka nihabi gutu vuro, turana maka nihabi ranga.”

³⁴E Isu i longoa a bakovi iea i koli malamala, lakea i takia, “I uka ma o basi na harikianga na Vure.” I vakatubu vonga, e huriki ri mangenge ni nanea.

E Kristo e Tune Rei

(Mateo 22:41-46; Lukas 20:41-44)

³⁵Na tahuna e Isu i vavara na tabeke na roho na Vure, i nana e huriki, “I navai e huriki a mari na vinara ri takia e Kristo e tune Davit? ³⁶“A Hanu Kiripiripi i habi a niluhoi ne Davit, i ta maea,

‘A Bakovi Dagi i takia a Bakovi Dagi nau,

“O made na limagu a kanegu,

ge harena na tahuna ga ratapile

e huriki a pile vomu.”’

³⁷“E Davit i galea ra bakovi iea a Bakovi Dagi vona. Pali i navai tabu ge ia e tune Davit?” Na tahuna e huriki ri longo a maka nitane Isu, ri vivi vona.

E Huriki a Mari na Vinara Ri Hale

(Mateo 23:1-36; Lukas 20:45-47)

³⁸Na tahuna e Isu i vara ria, i taki ria, i ta maea, “Mu matadoko ne huriki a mari na vinara. Ri ngaru ni rodo a varakia olaola, ri gi laho lae. Ri ngaru e huriki ri gi tagui ria na mada ni vahabi ni vakona maki. ³⁹Ri ngaru ni made muga na roho na vaponga. Ri ngaru ni made na gula kamumu na habu. ⁴⁰Ri tami e huriki a havuri ri panaho a malala ne ria. Muri ri rata a nivasileki i ola, ri gi mata kamumu na matane huriki. Muri ma, na parava na nipelekado a ngava, bara ri bole a nimadihi ge dagi hateka.

A Nihabi na Havuri

(Lukas 21:1-4)

⁴¹E Isu i vano i made tabukoi na hini ni ru a nihabi vona, i matanono e huriki ri ru dili a moni ne ria na tava na roho na Vure. E huriki a bakovi

^a 12:31 Levi 19:18 ^b 12:33 1Sam 15:22; Hos 6:6 ^c 12:36 Sng 110:1

na mahala ala kupo ri habi dili a moni dagi. ⁴²I valai ngane a havuri matasia, i ru dili a moni kiroko i rua, i manga a toea i rua kunana.

⁴³Lakea e Isu i gale valai vona e huriki a murimuri vona, i taki ria, “A taki muholi mua, ra havuri matasia iea i ru dili a moni dagi na tava, i rangi lobo e huriki ranga. ⁴⁴E huriki lobo ri habi dili a moni ri uka leho vona. Pali ra ngatavine iea, a matasia, i habi dili lobo a maka moni vona i tahoka.

A Nilobona Malala

(Mateo 24:1-51; Lukas 21:5-36)

13 ¹Na tahuna e Isu i laho tala na roho na Vure, tara murimuri vona i takia, “Mari ni tovo, o matai a maka ruma kamumu nga! O matai a maka kedo dagi ni hae ria vona!”

²E Isu i koli, i ta maea, “A maka roho dagi nga o matai, i uka tara kedo ge tabuli langa vona tara kedo tara. A kedo lobo bara ni ubipuka puru.”

³Na tahuna e Isu i made na lolo e Oliva i pesi na tabeke tara, i mata lakea na roho na Vure. Lakea e Petrus, e Iakop, e Ioanes, e Andreas to nana kapilohoa, ⁴“O taki mateu, garika ge bele a maki nga? Pali ge mata navai a kilakila na hini tabukoi ge bele a maki nga?”

⁵E Isu i koli, i ta maea, “Mu mamata, ma ge tami mua e huriki. ⁶E huriki ala kupo bara ri valai na ragu ri gi taki ria ta ria e Kristo, lakea bara ri tami e huriki ala kupo. ⁷Na tahuna mu longo a ngava na vabinga, a velengana vabinga, naha ni turutu. A maka maki nga bara ri bele taro, pali a nilobona malala i tabana. ⁸E huriki na robo tara bara ri vaubi turana e huriki na robo tara. A kabu na hariki tara bara i vaubi turana kabu na hariki tara. A maka vuruke, a pago bara i bele na tanga legelege. Ra maki nga bara ri bele muga, i manga a nimadihi na ngatavine i pahea a koma.

⁹“Mu tagari mua. Bara ni ru mua na limane huriki a bakovi ni pelekado a ngava, bara ni lagu mua pololilo na roho na vaponga. Bara ri vakapesi mua na matane huriki a matakari, a hariki, a vuhuna mu ramai iau. Na naro iea kunana bara mu vakalongo ria na Velenga Kamumu. ¹⁰A Velenga Kamumu bara ni vakalongo taro na tanga lobo. ¹¹Na tahuna ni lakavu mua, ni bole mua lakea na murina ngava, naha ni loho pae vona a ngava mu gu taki. Mu taki kunana a ngava a Hanu Kiripiripi ge habi ne mua, a vuhuna i uka ma ge mua ra mu gu ta. A Hanu Kiripiripi ra viri bara i ta polo ne mua.

¹²“A bakovi bara i lohople vona e turana, bara i taki e huriki ri gi bimatea. A bakovi bara i lohople e tuna, bara i taki e huriki ri gi

^d 12:43 2Ko 8:12 ^e 13:2 Luk 19:44 ^f 13:9 Mat 10:17-20 ^g 13:11 Luk 12:11-12

^h 13:12 Mat 10:21

rabalakia. E huriki a koma bara ri marikoi e tamane ria, ri taki e huriki ri gi bimate ria. ¹³E huriki lobo bara ri marikoi mua a vuhuna mu ramai iau. Pali e rei i pesi tora ge harena na parava i mate vona, a Vure bara i korimulea.

¹⁴^j“Na tahuna mu masia a bakovi muma hateka i ratapile a maki, i pesi na hini i uka ma a murina, pololilo na roho na Vure (A viri i gia a ngava iea ge longokilalea), e huriki ri made o Iudea ri gi ha lakea na lolo. ¹⁵^kPali a viri i pesi polovavo na ruma vona, i uka ma ge dili na ruma ge bole ranga maki. ¹⁶A viri i leho na hania, i uka ma ge hamule na tanga ge bole a varakia vona. ¹⁷^lE huriki a ngatavine ri singou, e huriki a ngatavine ri vakaruru, bara ri marego hateka na parava iea! ¹⁸Mu vasileki a maki nga i uka ma ri gi bele na tahuna na malangia, ¹⁹^ma vuhuna a maka parava nga bara ri hale liu na parava lobo. Hosi, na tahuna a Vure i ratarike a malala, i valai i harena mona, i uka tara parava ge hale maea. Pali muri ma, i uka ma ge hale maea tabu. ²⁰Bara a Bakovi Dagi i uka ma ge vakakapo a parava nga, e huriki lobo bara ri mate. Pali bara i vakakapo ria, ge korimule e huriki a bakovi a ngatavine i vulaki ria. ²¹I mavonga, nahea mu gu longo mai e huriki a bakovi ri ta maea, ‘Mata valai! E Kristo ia koea,’ o ‘Mata lakea! E Kristo ia lake!’ Naha ni longo mai ria, ²²ⁿa vuhuna e huriki a nitamina kristo, a nitamina propet bara ri pesi rike, ri rata a maka nivakasiri dagi, a maki dagi ni turutu vona, ri ngaru ni tami e huriki. Bara i kara ria, bara ri tami tabu e huriki a bakovi a ngatavine a Vure i vulaki ria. ²³Ngane mu mamata! A taki muga mua vona pali a maka maki ge bele muri ma.

²⁴^o“Muri na maka nimadihi nga ri gi bele:

‘A haro bara i paravunu,
a keva tara i uka ma ge para.

²⁵A maka hada bara ri mapasi tala na hunu,
a maka nitora ri tabuli na hunu bara ni polu.’

²⁶^p“Na tahuna iea e huriki lobo bara ri masia a Tuna Bakovi ge valai na bubu turana nitora dagi, a nipara. ²⁷^qMuri bara i rudu e huriki a agelo vona, ri gi vakalipopo e huriki a viri i vulaki pali na tabeke lobo na malala a hunu.

A Kai a Balele

(Mateo 24:32-35; Lukas 21:29-33)

²⁸“Mu bole a lohokanga vona a kai a balele. Na tahuna i tahoka a totona a rahana, i lubu a pagana, bara mu pasimata vona a tahuna haro

ⁱ 13:13 Mat 10:22; Ion 15:21 ^j 13:14 Dan 9:27; 11:31; 12:11 ^k 13:15 Luk 17:31

^l 13:17 Luk 23:29 ^m 13:19 Dan 12:1; Kap 7:14 ⁿ 13:22 Kap 13:13 ^o 13:24-25 Ais 13:10; Jol 2:10,31; 3:15; Kap 6:12-13 ^p 13:26 Kap 1:7 ^q 13:27 Mat 13:41

i tabukoi. ²⁹I mavonga kunana na tahuna mu matai a maki nga ri bele, bara mu lohoka vona a Tuna Bakovi i valai tabukoi liu pali. ³⁰A taki muholi mua, e huriki a bakovi a ngatavine na tahuna iea i uka ma ri gi mate ma, a maka maki nga ri gi bele taro. ³¹A hunu a malala bara ru lobo, pali a nitagu i uka ma ge lobo.

A Parava i Uka Ma Ni Lohoka Vona

(Mateo 24:36-44)

³²“I uka tara viri ge lohoka vona a parava, a kilala ge bele vona a maki nga. E huriki a agelo na hunu ranga i uka ma ri lohoka vona a parava iea. A Tuna Vure tara i uka ma i lohoka vona. E Tamana kunana i lohoka vona a parava iea. ³³Mu matadoko! Mu mamata! I uka ma mu lohoka vona a parava ge bele vona a maki nga. ³⁴I manga a bakovi i laho basi. I pea a ruma vona i taki e huriki a vora vona ri gi matakaria. I vaveru ne ria a maka leho. I takia a bakovi i matakaria a mataruma ge mamata. ³⁵“Pali mua ranga mu mamata, a vuhuna i uka ma mu lohoka vona a kilala bara i hamule vona a tahona ruma. Ge hamule na malunga, o na kuru rodo, o na malabeonga, o na hatelanga pokopoko. ³⁶Ma ge valai vakaturutu, ge matai mua mu gu mahita. ³⁷Ra maki a taki mua vona, a taki e huriki lobo vona. Mu mamata!”

E Huriki a Matakari Ri Varodo a Ngava

(Mateo 26:1-5; Lukas 22:1-2; Ioanes 11:45-53)

14 ¹A parava i rua muga na Habu na Nipagepolo, turana Habu na Bret i Uka Is, e huriki a prister dagi turana e huriki a mari na vinara ri matakana a dala ri gi tami e huriki, ri gi lakavua e Isu, ri gi rabalakia. ²Lakea ri ta maea, “Nahea si gi rabalakia na parava na habu, ma ge vaubi e huriki.”

A Ngatavine i Biria a Gine Isu

(Mateo 26:6-13; Ioanes 12:1-8)

³Na tahuna e Isu i made na tanga e Betani, i kani na ruma ne Simon, hosi i tahoka a patala. Na tahuna i kakani, a ngatavine tara i valai maia, i bolea a ulo ni rata na kedo a alabasta. A ulo iea i vona a nibiri manginoro. Ra nibiri iea i dagi hateka a mapana, a vuhuna ni rata na vutuna kai a nard. Lakea a ngatavine i bipodea a ulo, i guru puru na gine Isu a nibiri.

⁴Pali e huriki ri made vonga ri kaha, ri vanana mule ne ria, “I navai a ngatavine iea i guru tavulea a nibiri manginoro? ⁵Ra nibiri iea bara ni habi ni kona. A mapana i manga a mapana viri i leho na pida i taku.^f

^r 13:35 Luk 12:38 ^s 14:3 Luk 7:37-38 ^t 14:5 A denari i 300 i manga a mapana viri i leho na pida i taku!

Muri bara ni bole a moni ni habi lakea ne huriki a matasia.” Lakea ri tahatea a ngatavine.

⁶Pali e Isu i taki ria i ta maea, “Mu ha vona. I navai mu ngere maia? A maki i ratea nau i kamumu hateka. ⁷“E huriki a matasia bara ri made turane mua na parava vakaroro, bara mu kori ria na parava mu ngaru. Pali iau i uka ma ga made turane mua na parava vakaroro. ⁸“A ngatavine iea i ratea a maki i kara ni ratea. I guru puru a nibiri na kakaigu ne vona ni rata kamumu iau muga na nimategu. ⁹A taki muholi mua, na tahuna a Velenga Kamumu ni vakalongo lae, e huriki na tanga lobo na malala bara ri longoa a nuveri na ngatavine iea.”

E Iudas i Taki Talea e Isu
(*Mateo 26:14-16; Lukas 22:3-6*)

¹⁰Muri e Iudas Iskariot, a turane huriki a murimuri ala ravulu a polona i rua, i lakea ne huriki a prister dagi ge habi na limane ria e Isu. ¹¹Ri vivi ni longoa a ngava iea, lakea ri ta muholi vona ri gi habi vona ranga moni. Lakea e Iudas i davea a parava kamumu ge habia ne ria e Isu.

E Isu i Kani Turane Huriki a Murimuri
(*Mateo 26:17-25; Lukas 22:7-14; Ioanes 13:21-30*)

¹²“Ngane a mugana parava na Habu na Bret i Uka Is i bele. Na parava iea, ni lave tara tuna sipsip ge a nihabi ne vona ni luhoi mule a parava Nipagepolo. Lakea e huriki a murimuri ne Isu ri nanea, “I vai a hini o ngaru mi gi rata puru a maki ni kani vomu, go luhoi mulea a Habu na Nipagepolo?”

¹³Lakea i rudu a murimuri vona ala rua, i taki rua, “Muru dili na tanga dagi. A bakovi i kaloho a ulo na naru ge tagui marua, muru muri vona. ¹⁴Lakea muru takia a tahona roho i dili vona a vora, muru ta maea, ‘A mari ni tovo i nana vona a tabeke na mosi ge kani turana e huriki a murimuri vona na habu.’ ¹⁵Muri bara i vakasiri marua vona a tabekena ruma i ngavaka polomeli, i tahoka pali a gula ni made ni kado puru. Muru gutu puru vonga a maki ni kani ne hita.”

¹⁶Lakea ru vano, ru dili na tanga dagi, ru matai a maka maki i manga a hini e Isu i taki rua vona. Muri ru gutu puru a maki ni kani na Habu na Nipagepolo.

¹⁷Na rodo e Isu i bele turana e huriki a murimuri vona ala ravulu a polona i rua. ¹⁸“Na tahuna ri kakani, e Isu i taki ria, “A taki muholi mua, i tara ne mua i kani turagu ngane bara i habi iau na limane huriki a bakovi hale.”

¹⁹Na tahuna ri longoa a ngava iea ri dodo, lakea ri ta takutaku, ri ta maea, “Ma ge iau?”

“ 14:7 Vin 15:11 v 14:8 Ion 19:40 w 14:12 Nim 12:6 x 14:18 Sng 41:9

²⁰Pali e Isu i ta maea, “Ra bakovi iea, ia a turane mua e huriki ala ravulu a polona i rua, ra viri i lutu puru a bret turagu na tavila. ²¹A Tuna Bakovi bara i mate, i manga a nita ni here puru hosi. Pali ra bakovi i habia na limane huriki a pile, a Vure bara i ratapilea! Bara i kamumu hateka e kinana i uka ma ge podea hosi!”

A Bret, a Vain

(Mateo 26:26-30; Lukas 22:14-20; 1 Korin 11:23-25)

²²Na tahuna ri kakani, e Isu i bolea a bret, i kavurike a Vure vona, i kevea, i habi ne ria, i ta maea, “Ra bret iea a bobogu, mu bolea mu kania.”

²³Muri i bole rikea a kikei na vain, i kavurikea a Vure, i habia ne ria. Lakea ria lobo ri ninu vona.

²⁴^yMuri i taki ria i ta maea, “Ra vain iea a daragu, ge pori nau ne vona ni vakatorea a ngava muholi a Vure i rata karaba turane huriki. Ge pori ne vona ni korimule e huriki ala kupo. ²⁵A taki muholi mua, iau i uka ma ga ninu tabu a vain, bara i vano i harena na parava a ninu a vain karaba na harikianga na Vure.”

²⁶Ri kalolo lobo a linge vasileki, muri ri lakea na lolo e Oliva.

E Petrus Bara i Nanarovi ne Isu

(Mateo 26:31-35; Lukas 22:31-34; Ioanes 13:36-38)

²⁷^zLakea e Isu i taki e huriki a murimuri vona i ta maea, “Mua lobo bara mu ha taro iau. A ngava ni here puru na Hinere i ta maea,

‘Bara rabalakia a matakari na sipsip,
bara ri ha viliha a maka sipsip.’

²⁸^a“Pali na tahuna ga mahuri mule, ga muga lakea o Galili.”

²⁹Lakea e Petrus i ta maea, “E huriki lobo bara ri ha, pali iau kunana i uka ma ga ha.”

³⁰E Isu i koli i ta maea, “Muholi hateka, na rodo a kureko i uka ma ge tangi balaka rua ma, bara o nana rovi iau balaka tolu ke.”

³¹^bPali e Petrus i ta puhaki hateka i ta maea, “Iau i uka ma ga nana rovi ioe. Bara mate turamu.” E huriki a murimuri lobo ri taki kunanea a ngava i taku.

E Isu i Vasileki o Getsemani

(Mateo 26:36-46; Lukas 22:39-46)

³²^cMuri ri lakea o Getsemani, lakea e Isu i taki e huriki a murimuri vona i ta maea, “Mu dava iau koea, ga vano taro ga vasileki.” ³³I tuli

^y 14:24 Nim 24:8; Jer 31:31-34; Sek 9:11; 1Ko 10:16; Hib 9:20 ^z 14:27 Sek 13:7

^a 14:28 Mat 28:16; Mrk 16:7 ^b 14:31 Ion 11:16 ^c 14:32 Ion 18:1

kunana e Petrus, e Iakop, e Ioanes to vano turana. I lege a lohona i mava a kakaina. ³⁴ Lakea i taki tou, “Iau a dodo hateka, a nidodo i popote ge rata iau ga mate. Moto made koea, moto matapara, moto mamata.”

³⁵ E Isu i laho lokovonga popote, i tabuli ngala puru na malala i vasileki ni gi bole vuroki vona a nimadihi ta ge bolea. ³⁶ I vasileki maea, “Aba,^f Tata! A maki lobo a maki tavula vomu. O bole vurokia nau a nimadihi iea. Pali a ningaru vomu, i uka ma ga ningaru nau.”

³⁷ Muri i hamule lakea na murimuri vona i matai tou to mahita, lakea i vangoa e Petrus, i ta maea, “O Simon, i navai o mahita? O koi ni matapara? ³⁸ Moto mamata, moto vasileki, ma moto go dili na nitoni. A hatene matou i ngaru ni ratea, pali a kakaine matou i uka ma i gao.”

³⁹ E Isu i vano tabu i vasileki manga a hini muga. ⁴⁰ Na tahuna i hamule, i matai tabu tou to mahita, a vuhuna to matatulu hateka. Na tahuna i vango tou, to ngapa.

⁴¹ I hamule mai tou balaka tolu, lakea i taki tou, “Ra matou, moto tabana ni mahita, ni malo? I lobo! A kilala i valai pali. A Tuna Bakovi bara ni habi na limane huriki a bakovi hale. ⁴² Moto pesi rike si gi vano! Mata lakea! A viri ge habi iau na limane huriki a pile i valai ngane.”

E Isu Ni Lakavu

(Mateo 26:47-56; Lukas 22:47-53; Ioanes 18:3-12)

⁴³ E Isu i tabana ni ta, lakea e Iudas, ra turane huriki ala ravulu a polona i rua, i bele malaviriri. E huriki a prister dagi, a mari na vinara, a bakovi dagi ri rudu e huriki a bakovi, ri bole a bainat a lebo, ri vano turane Iudas.

⁴⁴ A bakovi ta ge habi e Isu na limane huriki a pile i ta turane ria, i ta maea, “A bakovi ga ngurua, ia kunana. Mu lakavua, mu tagaria, mu turari lokovongea.” ⁴⁵ E Iudas, i malaviriri kunana i lakea ne Isu i takia, “Mari ni tovo!” Muri i ngurua. ⁴⁶ Lakea e huriki ri lakavua. ⁴⁷ Pali a bakovi tara i pesi tabukoi i lalu talea a bainat vona i palakudua a talingana vora na prister dagi.

⁴⁸ Lakea e Isu i ta maea, “Ra mua, i navai mu valai turana bainat a lebo, mu gu lakavu iau? Mu rata manga iau a bakovi hale. ⁴⁹ Na parava lobo a turane mua, a tovo pololilo na roho na Vure, pali i uka ma mu lakavu iau. Pali ngane a ngava ni here puru na Hinere ge bele muholi.” ⁵⁰ Muri e huriki a murimuri vona ri ha taroa.

⁵¹ Tara riau i rea na lavalava keakea kunana i muri gosi ne Isu. Na tahuna ri lakavua, ⁵² i marisi a lavalava vona, i ha bobo ia.

^d 14:34 Ion 12:27 ^e 14:36 Mrk 10:38; Ion 6:38 ^f 14:36 A ngava e ‘Aba’ a nita Aram. A pelegona i manga ‘tata.’ A nita Aram a nitane huriki a Iuda na tahuna e Isu i laho na malala. ^g 14:49 Luk 19:47; 21:37; Ion 18:20 ^h 14:50 Sng 31:11

E Isu Ni Pelekado*(Mateo 26:57-68; Lukas 22:54-55,63-71; Ioanes 18:13-14,19-24)*

⁵³E huriki a bakovi ri lakavua e Isu ri turaria lakea na ruma na prister dagi tara. E huriki a prister dagi, e huriki a gare, e huriki a mari na vinara ri vapo vonga. ⁵⁴E Petrus i muri kavula basi popote vona, i lakea na mataruma na prister dagi. Na tahuna i bele vonga, i made turana e huriki a tagari, i hua a kanono.

⁵⁵E huriki a prister dagi turane huriki a bakovi dagi o Iuda ri toni ni matakana a ngava ri gi rabalaki e Isu vona, pali i uka ma ri matavisia tara ngava. ⁵⁶E huriki ranga ri valai ri tatami na ngava. Pali a ngava ne ria i vaperesi vilaha.

⁵⁷Muri i ranga bakovi ri padi virihia na ngava ri ta maea, ⁵⁸ⁱ“Mi longoa a bakovi iea i takia ta ge pukea a roho na Vure, ri haea e huriki a bakovi. Muri, ge lobo a parava i tolu, ge hae mule tabua, i uka ma ni gi hae na limana bakovi.” ⁵⁹Pali a ngava ne ria ranga i vaperesi.

⁶⁰Muri a prister dagi i pesi rike na matane huriki, i nanea e Isu, “I navai i uka ma o taratoto? O luhoi navai vona a ngava ni padi virihi ioe vona?” ⁶¹Pali e Isu i uka ma i koli. I uka ma i takia tara ngava.

Lakea a prister dagi tara i nana tabua, “I muholi ioe e Kristo, ioe a Tuna Vure, ra Vure si kavurikea?”

⁶²Lakea e Isu i koli, i ta maea, “Iau kunana. Muri bara mu masia a Tuna Bakovi, i made na limana kanena Viri i Tuhaka, ge valai turana bubu na hunu.”

⁶³Na tahuna a prister dagi i longoa a ngava iea, i rapea a varakia vona, i ta maea, “I navai si gi ngaru tabua tara viri ge habi a ngava? ⁶⁴^JMua lobo mu longoa a bakovi iea i harogia a Vure. Mu luhoi navai?”

E huriki lobo ri takia e Isu a bakovi hale, ngane ge mate. ⁶⁵Muri i ranga e huriki ri kalupe taho. Lakea ri kavitagua a matana, ri ubia na limane ria, ri takia ri ta maea, “O vakasiri ioe ngane ge ioe a propet! E rei i ubi ioe?” Muri e huriki a tagari ri tuli talea ri ubia.

E Petrus i Nana Rovi ne Isu*(Mateo 26:69-75; Lukas 22:56-62; Ioanes 18:15-18,25-27)*

⁶⁶Na tahuna e Petrus i made na mataruma, a vora ngatavine na prister dagi i laho polo. ⁶⁷Na tahuna i masia e Petrus i hua a kanono, i laho lokovonga tabukoi i matai kamumua, lakea i takia, “Ioe tara, o turana ra bakovi o Nasaret, re Isu.”

⁶⁸Pali i lavuni, i ta maea, “Iau i uka ma a longokilalea a ngava o takia.” Muri e Petrus i pe a hini nga i pori na mataruma, lakea a kureko i tangi.

ⁱ 14:58 Ion 2:19-21 ^j 14:64 Levi 24:16; Ion 19:7

⁶⁹Muri, a vora ngatavine i matai tabua, lakea i taki tabu e huriki ri pepesi tabukoi, i ta maea, “Ra bakovi iea, a turane ria.” ⁷⁰Pali e Petrus i lavuni tabu.

I uka ma i tabaka, e huriki ri pesi tabukoi vonga ri takia, ri ta maea, “Muholi hateka ioe tara a turane ria, a vuhuna ioe a bakovi o Galili.”

⁷¹I rudu raha mulea, i harogi, i ta maea, “Muholi hateka, iau i uka ma lohoka vona ra bakovi mu takia.”

⁷²I malaviriri kunana a kureko i tangi tabu, lakea e Petrus i longovisia ngane a ngava i takia vona e Isu: “A kureko i uka ma ge tangi balaka rua ma, bara o nana rovi iau balaka tolu.” Muri i upu rike a nangi i tangi.

E Isu i Pesi na Matane Pilato

(Mateo 27:1-2,11-14; Lukas 23:1-5; Ioanes 18:28-38)

15 ^{1k}Na hatelanga pokopoko e huriki a prister dagi turane huriki a bakovi dagi, a mari na vinara, a tara na Sanderin, ri vata vona a maki ri gi ratea ne Isu. Muri ri kolo tatea, ri vano ri habia ne Pilato.

²Lakea e Pilato i nanea, “Ra ioe, i muholi ioe a hariki ne huriki a Iuda?”

E Isu i koli i ta maea, “A ngava o takia pali.”

³Muri e huriki a prister dagi ri padi virihia na ngava i kupo. ⁴Lakea e Pilato i nana tabua, “O longo e huriki ri padi virihi ioe na ngava i kupo. I navai i uka ma o taratoto a ngava?”

⁵Pali i manga a hini muga, e Isu i uka ma i taratoto, lakea e Pilato i turutu.

E Pilato i Taki e Isu Ge Mate

(Mateo 27:15-26; Lukas 23:13-25; Ioanes 18:38–19:16)

⁶Na parava na Habu na Nipagepolo na pida lobo, ri muri mai a vilo hosi, bara ri bole talea na bavi a bakovi hale tara i ngarua e huriki. ⁷Na tahuna iea, a bakovi a rana e Barabas i made na bavi turane huriki ri putu puru a vinara. Ia a bakovi ni vaubi, ni rabalaki e huriki. ⁸Lakea e huriki ri lakea ne Pilato ri nanea ge bole talea na bavi tara bakovi hale, ge muri mai a vilo ni rata vakaroro.

⁹Lakea e Pilato i nana ria, “Mu ngaru iau ga bole talea a hariki ne huriki a Iuda, ge vano?” ¹⁰I nana mavonga a vuhuna i matakilaka vona e huriki a prister dagi i madihi a hatene ria ne Isu, lakea ri bole lakea vona. ¹¹^mPali e huriki a prister dagi ri piurike e huriki ri gi ngarua e Barabas ni gi bole tala na bavi, pali e Isu ge nahea.

¹²Lakea e Pilato i nana ria, “Pali ga rata navai ngane a viri mu takia ta ia a hariki ne huriki a Iuda?”

^k 15:1 Luk 22:66 ^l 15:5 Ais 53:7; Mrk 14:61 ^m 15:11 Apo 3:13-14

¹³Ri magulu ri ta maea, “O paditatea na kai tavalavala!”

¹⁴Lakea e Pilato i nana ria, “I navai ge mavonga? A ra naro hale i ratea?”

Ri magulu rike hateka tabu ri ta maea, “O paditatea na kai tavalavala!”

¹⁵E Pilato i ngaru ni ramai a ningaru ne huriki, lakea i bole talea na bavi e Barabas. Pali e Isu ni lagu, muri ni habi lakea ne huriki a nugumaheto, ri gi paditatea na kai tavalavala.

E Isu Ni Padikede

(Mateo 27:27-31; Ioanes 19:2-3)

¹⁶E huriki a nugumaheto ri tulia e Isu i lakea na roho ne Pilato, ra ni gale a Praetorium,ⁿ lakea ri gale palupu e huriki a tara na nugumaheto. ¹⁷Ri vakarodoa na varakia kuakua, muri ri vakatamea na tama ni rata na barakau. ¹⁸Muri ri vakatubu ni padikede ri ta maea, “Ge made vakaroro a hariki ne huriki a Iuda!” ¹⁹Ri ubia a gina na lebo balaka kupo. Ri kalupe taho, ri turume puru na ngalana, ri kavurikea. ²⁰Ri padikede loba, muri ri kali talea a varakia kuakua, ri vakarodo mulea vona a varakia vona. Muri ri turari talea ri gi paditatea na kai tavalavala.

E Isu Ni Paditata

(Mateo 27:32-44; Lukas 23:26-43; Ioanes 19:17-24)

²¹°A bakovi tara na tanga e Sirene a rana e Simon; e tamane Aleksander e Rupus, i valai polovavo na tanga dagi. Ta ge laho polo ne ria, ge dili na tanga, pali ri vakukua ge kaloho poloa a kai tavalavala. ²²Ri turaria e Isu i lakea na tanga e Golgota. A rana tanga iea, ni vunu muri mai a tuhana gina bakovi. ²³Muri ta ri gi habia vona a vain ni pulo turana naru ni gale a mert, pali e Isu i marikoi ni ninu. ²⁴^pMuri e huriki a nugumaheto ri paditatea na kai tavalavala. E huriki a nugumaheto ri vaveru vona a varakia vona. Ri rehi, ri varangi vona tara rihiva, pali e rei a viri i mulangi, bara i bolea tara varakia vona.

²⁵Na kilala i polova na hatelanga ri paditatea e Isu. ²⁶A kilakilana ni here ni gi matai, a ra vuhuna i mate, i ta maea, “A Hariki Ne Huriki A Iuda.” ²⁷⁻²⁸A bakovi ru panaho ru rabalaki a viri, rua ranga ni paditata. I tavore na limana kanena tara, na maurina tara. ²⁹^eE huriki ri laho polo ri mapakulu, ri harogia e Isu ri ta maea, “Ra ioe o taki ta go pukea a roho na Vure, muri go hae tabua na parava ge tolu. ³⁰O vakakori ioe na kai tavalavala, o puru valai!”

³¹E huriki a prister dagi, e huriki a mari na vinara ria ranga ri padikede, ri ta maea, “I korimule e huriki ranga, pali i keru ni korimule

ⁿ 15:16 A ngava e praetorium a nita Latin. I manga a roho dagi na gavana.

° 15:21 Rom 16:13 ^p 15:24 Sng 22:18 ° 15:29 Sng 22:7; 109:25; Mrk 14:58

ia! ³²Ra viri ta ge korimule e huriki, a hariki ne Israel, ge pea a kai tavalavala ge puru valai, pali bara si masia si luhoi tora ia.” Ra bakovi ni paditata rua turane Isu, rua ranga ru harogia.

E Isu i Mate

(Mateo 27:45-56; Lukas 23:44-49; Ioanes 19:28-30)

³³Na kuru haro a uvo i puru, i kavitagau a tabeke lobo, i vano i harena na kilala i tolu. ³⁴Na kilala i tolu na malunga, e Isu i gale dagi i ta maea “Eloi, Eloi, lama sabaktani?” Ra i maea, “Vure nau, Vure nau, i navai o lohopile iau?”

³⁵E huriki ri pepesi tabukoi ri longoa, ri ta maea, “Mu longo lakea, i galea e Elaisa.”

³⁶Lakea a bakovi tara i nunu, i bolea a niduvi, i lutu puru na ulu na vain, i kolotatea na kai, i toto rikea, i habia ne Isu ge damea. Lakea i ta maea, “Naha ni ngere. Si gi masia e Elaisa ge valai ge bole puru vilia, o ge uka.”

³⁷Muri e Isu i gale dagi, i mate. ³⁸Na tahuna iea, a lavalava dagi na roho na Vure i mavida valai meli i puru, i bale rua. ³⁹Na tahuna e Isu i mate, a ubu na tara na nugumaheto i pesi tabukoi. Na tahuna i longoa e Isu, i masia a nimatena, lakea i ta maea, “Muholi hateka, ra bakovi iea a Tuna Vure!”

⁴⁰E Maria Magdala, e Maria kinane Iakop kiroko rua e Ioses, e Salome, to pesi basi popote turana ngatavine ranga, ri matanono. ⁴¹Hosi, ri ramaia e Isu o Galili, ri tuhoria, ri valai turana o Ierusalem. Ria ranga ri pesi, ri matanono.

E Isu Ni Tanu

(Mateo 27:57-61; Lukas 23:50-56; Ioanes 19:38-42)

⁴²A parava muga na Parava Nimalo, a parava ni gutu puru a maka maki ni kani. I malunga ngane a hini. ⁴³A bakovi tara, e Iosep o Arimatea, a tara na Sanderin, e huriki ri togoa. I hatenono vona a harikianga na Vure ge valai. I kinigao, i lakea ne Pilato i nanea vona a podane Isu. ⁴⁴E Pilato i turutu ni longo e Isu i mate pali. Lakea i gale vilia vona a ubu ne huriki a nugumaheto ge nanea vona e Isu i mate muholi o i uka. ⁴⁵Na tahuna e Pilato i longo na ubu i takia e Isu i mate muholi, lakea i takia e Iosep ge bolea a podana. ⁴⁶Lakea e Iosep i konea a lavalava keakea, i parua a podane Isu na kai tavalavala, i bunua na lavalava. Muri i rua a podana na babe ni keli tala na kedo, i kule karia a ngavana babe na kedo dagi. ⁴⁷E Maria Magdala, e Maria kinane Ioses, ru masia a babe ni ru a podane Isu vona.

† 15:34 Sng 22:1 † 15:36 Sng 69:21 † 15:40 Luk 8:2-3

E Isu i Mahuri Mule*(Mateo 28:1-8; Lukas 24:1-12; Ioanes 20:1-10)*

16 ¹I lobo pali a Parava Nimalo lakea e Maria Magdala, e Maria kinane Iakop, e Salome to kona a mangisipa to go biri a kuline Isu vona. ²Na hatelanga, na mugana parava na vik, to laho lakea na babe. ³Lakea to vanana, “E rei ge kule talea ne teu a kedo ni kule kari a ngavana babe vona?”

⁴Na tahuna to bele, to masia a kedo ni kule vuroki pali. Ra kedo iea i dagi hateka. ⁵Na tahuna to dili na babe to masia a riau i rodo a varakia keakea i made na tabeke na limana kanene tou, lakea to turutu.

⁶A bakovi iea i ta rike, i ta maea, “Naha ni mangenge. Iau a lohoka vona moto matakanea e Isu o Nasaret, ra ni paditata na kai tavalavala. I mahuri mule pali na matenga. I uka a hini koea. Moto masia a murina ni vakatabuli vona rira. ⁷“Ngane moto vano, moto vakalongo e huriki a murimuri vona turana e Petrus, moto ta maea, ‘E Isu i muga lakea o Galili. Mu vano mu masia vonga, i manga a ngava i taki muga mua vona.’ ”

⁸To turutu, i vakulu a tagane tou na mangea. Lakea to ha taroa a babe, to nunu hamule. Pali i uka ma to vakalongoa tara viri, a vuhuna to mangenge hateka.

E Maria Magdala i Masia e Isu*(Mateo 28:9-10; Ioanes 20:11-18)*

⁹E Isu i mahuri mule na matenga na hatelanga na mugana parava na vik. I bele taro ne Maria Magdala, ra ngatavine e Isu i lili tala vona hosi a hanitu i polorua. ¹⁰Muri e Maria Magdala i vano ge vakalongo e huriki a murimuri ra ri rakoli vona ri tatangi. ¹¹Na tahuna e Maria i vakalongo ria vona i masia e Isu i mahuri mule, ri luhoi ia ta i tatami.

E Isu i Bele na Murimuri Vona ala Rua*(Lukas 24:13-35)*

¹²Muri e Isu i bele tabu na murimuri vona ala rua na tahuna ru lalaho na dala, ta ru gu lakea na tanga tara. Pali i uka ma i mata manga ia muga. ¹³Lakea ru hamule, ru vakalongo e huriki a murimuri ranga. Pali ria ranga ri luhoi ta a ngava taminga kunana.

E Isu i Rudu e Huriki a Murimuri*(Mateo 28:16-20; Lukas 24:36-49; Ioanes 20:19-23)*

¹⁴^vMuri e Isu i bele taho e huriki a murimuri vona ala ravulu a polona i taku na tahuna ri kani. I tahate ria, a vuhuna i uka ma ri luhoi tora, ri

^u 16:7 Mat 26:32; Mrk 14:28 ^v 16:14 1Ko 15:5

gigi tora hateka, i uka ma ri luhoi e huriki ri masia na tahuna i mahuri mule pali.

¹⁵ ^wMuri i taki ria, “Mu lakea na tanga lobo na malala, mu vakalongo e huriki lobo na Velenga Kamumu. ¹⁶ ^xE rei a viri i luhoi tora iau, ni gi vahilolo, a Vure bara i korimulea. Pali e rei a viri i koi ni luhoi tora iau, bara i velu. ¹⁷ ^yE huriki ri luhoi tora iau bara i bele ne ria a naro nga: Bara ri lili tala e huriki a hanitu na ragu. Bara ri ta na ngava karaba. ¹⁸ ^zBara ri nugu a mata na limane ria, ri ninu a naru hale i uka ma ge vakahale ria. Bara ri ru a limane ria ne huriki ri giloa, bara ri tavaga.”

E Isu i Sike na Hunu

(Lukas 24:50-53; Apostolo 1:9-11)

¹⁹ ^a E Isu a Bakovi Dagi i vara lobo e huriki a murimuri vona. Muri ni bole sike na hunu i made turana a Vure, na limana a kanena. ²⁰ ^bMuri e huriki a murimuri ri vano, ri lakea na tabeke lobo na malala, ri vara e huriki na Velenga Kamumu. E Bakovi Dagi i tuhori ria i vakatora a ngava vona na maka nivakasiri.

^w 16:15 Apo 1:8 ^x 16:16 Apo 2:38 ^y 16:17 Apo 2:4; 8:7 ^z 16:18 Luk 10:19; Apo 28:3-6
^a 16:19 Apo 1:9-11; 2:33-34 ^b 16:20 Apo 14:3; Hib 2:3-4